

東

華

續

錄

東華續錄

同治三十七

臣王先謙敬編

臣張式恭恭校

八月己巳朔諭內閣恭親王奏披瀝下忱請更正坐次一摺恭親王於道光三十年錫封親王彼時惇親王係在郡王班次欽奉皇考文宗顯皇帝諭旨嗣後除朝祭大典外內廷行走及各衙門請派差使單內惇郡王奕誴著在恭親王奕訢之前嗣於咸豐六年惇郡王由貝勒賞還郡王咸豐十年惇郡王由郡王晉封親王經宗人府禮部奏請坐次奉硃批合坐坐次在恭親王奕訢之次當時均未奉有內廷班次之旨茲據恭親王奏王與惇親王分屬宗支情闊手足每逢朝祭之典以及內廷行走班次常懷踰越之慚懇恩更正朝祭大典及內廷行走班次等語我慈安皇

太后慈禧皇太后因奉有咸豐十年 皇考硃諭未肯遽允所請慰勉再三恭親王以昆季之誼不欲以弟先兄殷殷顧怨不得已推原道光三十年前奉 諭旨變通辦理俯如所請俾克盡友恭之義藉以順秩敘之常嗣後朝祭大典內廷行走及各衙門請派差使聯銜奏事摺件恭親王均著排列在惇親王之次以遂誠悃○諭宗人府奏請欽定醇郡王朝班坐次分繕清單請旨一摺據稱諸王朝班坐次向由禮部奏定見在醇郡王已賞加親王銜其坐次似應再行覈議查咸豐年閒定郡王載銓賞加親王銜時宗人府所辦稿件俱列銜在親王之次郡王之前當卽據查禮部旋據覆稱載銓加銜時並未另奏坐次例內亦無郡王加銜應奏坐次明文此次醇郡王坐次應否移易之處伏候欽定等語朝班坐位典禮依闈自應次序合宜方符體制所有醇郡王坐次如遇

兩翼合坐除恭親王本日已俯如所請移在惇親王之次外醇郡
王卽著在恭親王之次克勤郡王晉祺之前其左翼坐次著仍在
惇親王之次孚郡王之前嗣後如有特旨加銜者均著宗人府照
此次成案奏請辦理著爲令○諭前因南城御史景霖等奏宗室
覺羅潛住外城滋生事端當經明降諭旨飭查究辦並勒限遷回
內城茲據宗人府奏稱例載宗室覺羅在城外居住者應由該城
坊編查列入印冊隨時查覈儻於編查時不遵約束或查有不安
本分及任意容畱閒雜人等卽由巡城御史密呈都察院堂官酌
其情節較輕者知照宗人府派員會同城坊查究其情節較重者
卽由都察院奏聞辦理見在居住外城之宗室覺羅請仍照舊例
並酌擬章程辦理等語宗室覺羅居住外城原屬例所不禁惟該
御史等前奏所稱近有詭託姓名滋生事端不知自愛者亦不可

不嚴行查辦嗣後居住外城之宗室覺羅等除業經編入保甲者
仍照舊例辦理母庸概行遷回內城外如有詭託姓名潛居外城
滋生事端不知自愛者卽著照宗人府所擬一面由該城御史查
明姓名旗分開單知照該衙門查傳究辦一面由宗人府飭傳各
旗族學長佐領等勒令卽時遷回內城嚴加管束經此次明定章程
之後儻該宗室覺羅人等仍有未經報明城坊編入甲冊潛居
外城滋事怙惡不悛者一經各該城御史查拏送交宗人府卽著
該衙門從嚴懲辦以肅禁令○諭議政王軍機大臣等楊岳斌沈
葆楨奏官軍攻克南豐縣城大概情形一摺據稱參將韓進春等
稟報南豐縣城已於七月十八日經官軍克復一切詳細情形諒
已奏報在途前此奏報克復宜黃等處所有著名賊首李侍賢汪
海洋陳炳汶等逆未據聲敘曾否傷斃此次攻拔堅城該逆是否

殲擒抑已於宜黃等處殲斃該縣接壤甯都與福建建甯甯化處
處毗連韓進春駐守建昌前報東路長興地方復有賊擾見在賊
由何路竄逃著楊岳斌沈葆楨查明具奏並檄飭各路防兵嚴防
竄越毋令再擾完善之區如賊逼近閩境仍遵前旨飛咨閩省督
撫嚴飭防軍會剿毋稍疏虞江西逆踞五城俱已克復楊岳斌於
何時起程赴陝甘總督新任並著迅速具奏將此由六百里各諭
令知之○諭滿慶恩慶奏接奉寄諭遵飭汪曲結布撫輯僧俗見
據協理商上事務諾們罕汪曲結布稟稱遵查三大寺起覺根由
實因噶徵徇私作弊與色拉寺眾僧無涉見在三大寺甚屬和睦
藏地亦安靜肅清惟當謹遵諭旨協辦商務隨同達賴喇嘛撫綏
僧俗等情並懇轉進哈達佛匣暨鈔錄商屬僧俗番眾切實甘結
呈覽請將噶徵並其從人在京作何發落及噶徵寺院土地人民

應否歸達賴喇嘛收管降旨遵辦各等語前因喀徵剋扣布施辦理不善致僧俗激成事端汪曲結布素爲眾情所服諭滿慶等飭令協辦商務茲據滿慶等奏汪曲結布遵諭撫綏僧俗全藏安靜辦理甚爲妥協著滿慶等傳旨嘉獎仍責令將商上事務並合藏僧俗番眾人等隨同達賴喇嘛妥爲綏輯以期永遠相安儻此後辦理未盡合宜或致別啟釁端卽惟滿慶恩慶等及達賴喇嘛汪曲結布是問喀徵業已在京病故其從人等如令卽行回藏恐其復行造言生事反致煽惑人心是以仍令在京居住至喀徵所管寺院土地人民著照滿慶等所擬歸達賴喇嘛收管卽由滿慶等傳知妥辦前經疊諭福濟馳赴西藏幫同景紋勘辦贍封與土司互鬪情形日久尙未前往著俟道路疏通各土司均已安設驛站卽行擯還前旨迅速前進毋得再有稽畱滿慶俟景紋到藏卽將

藏務移交起程回京並著崇實駱秉章選派委員接管拉里糧務以便李玉圃交替回川俟該員到川後卽由崇實駱秉章會同滿慶等將該員勞績查明保奏候旨錄用本日據崇實駱秉章奏唐古特借用廓爾喀礮位並藥鉛夫役口糧等項共需銀七千餘兩見因道途通塞靡常川省勢難剋期解到諸飭藏中先行籌給等語著滿慶恩慶於藏庫見存無論何項先行籌款撥給俟道路疏
通卽由駱秉章於撥解藏餉時搭解歸款將此由五百里各諭令知之○諭崇實駱秉章奏前奉諭旨飭查已革總堪布身死情節因川中距藏窎遠不特此案無從懸揣卽藏中實在情形亦難知悉見據史致康稟稱明正裏塘各土司見已具結安站由打箭鑪以至裏塘大路可通惟一到乍了卽入藏地福濟等能否前進尙未可知且恐番官與各土司串通故爲設站俟福濟等到後任其

要挾此時汪曲結布等已成固結莫解之勢請暫予羈縻將從前各案暫緩深求俟滿慶李玉圃進關再行查辦等語本日又據滿慶等奏接奉寄諭飭令汪曲結布協理商上事務該達賴喇嘛及汪曲結布均各感激並商屬僧俗公同出結永遠和睦各等語西藏情形本非內地可比朝廷所重惟在全藏乂安是以歷次所降諭旨雖暗諭崇實駱秉章福濟景紋將從前各案密行查辦而於滿慶等寄諭內仍將汪曲結布暫示羈縻令其協理商上事務並將李玉圃嘉獎令滿慶等會同駱秉章保奏送部引見原以安藏俗之心而撤滿慶李玉圃之權令其離藏以便查辦駱秉章所奏各情卽係朝廷命意所在本日復將噶徵在京身死一節諭知滿慶所有商上事務卽責成汪曲結布妥爲撫輯永息爭端仍將崇寶等銜名敘入以釋其疑惟滿慶李玉圃把持藏務狼狽爲奸已

成滇省之勢非調令進關無從辦理滿慶本日摺內復稱李玉剛應俟川派接管糧務之員到來並景紋等抵藏再會同該將軍總督聲敘勞績保奏並該大臣亦即交卸回京等語是景紋等一日不能抵藏滿慶等反得以交卸無人藉詞延宕藏務終無了期兒在各土司均已具結安站是由川赴藏道路業已疏通福濟景紋屢經有旨嚴催尙復任意遷延畏首畏尾實屬不知緩急著卽星馳前進抵藏後宣布朝廷德意將僧俗人眾妥爲安撫以便滿慶交卸回京一面將交查各案嚴密訪查會同崇寶駱秉章覆奏辦理並著駱秉章迅速揀派接管糧務之員星馳赴藏令李玉圃交卸回川使該二員無所藉口降徵雖死其隨從人等若令其卽行回藏恐爲滿慶等謀害滅口此時仍暫羈京師俟福濟景紋抵藏後如有應行對質之處再將該隨從人等遞解回藏以憑質訊將

此由五百里各密諭知之○庚午諭議政王軍機大臣等常清奏
回匪肆擾三城伊犁危急請催調各路官兵援剿一摺庫車喀喇
沙爾兩城被匪占踞由伊犁至烏魯木齊中間庫爾喀喇烏蘇烏
蘭烏素及毗連之綏來昌吉各縣逆回肆擾文報不通六月二十一
日烏魯木齊漢城失守滿城被圍新疆逆燄日張勢甚岌岌伊
犁爲各城領袖防守最關緊要常清見將圖庫爾所帶之兵一千
餘名調回守城並將蒙古等兵交德明管帶防堵要隘又派蒙古
兵丁防守精河等處卽著照所擬嚴飭各軍扼要嚴防毋稍疏懈
巴燕岱等八城回民尙煽堪虞著隨時彈壓毋令生事塔爾巴哈
台關繫伊犁北路著錫霖速爲接印任事調集所屬蒙兵護守城
池會同博勒果素安籌辦理再調蒙古兵二千名交明緒統帶來
伊與常清會籌防剿明緒務卽星馳前進不可稽延葉爾羌蒙古

罕等處待援急切此時伊犁無兵可撥務須飛咨各該城固守待援毋稍疏失烏魯木齊爲東西大路咽喉若不將漢城迅圖克復滿城之圍何由而解且東西大路梗塞更阻我進兵之路著麟興車林敦多布廣鳳奎昌迅派喀爾喀兵二萬名馳赴烏魯木齊不克漢城立解滿城之圍如一時不能足數先其所急籌撥數千亦可稍壯聲勢並著該大臣等迅速籌辦漢城失守後業布沖額等如何下落平瑞困守危城著嚴行守禦以待援師俟烏科二城兵到卽著會合夾擊以收聚殲之效一面將漢城失守情形詳查具奏見在江甯克復全股髮逆殲滅南路大兵可以騰出已飭令各路抽調精兵出關剿賊並飛催四川等省督撫迅將前撥餉銀源源籌解不日兵餉俱到回逆諒不難次第殄除常清當就見有兵力並調到各兵統籌勦辦以保疆疆將此由六百里各諭令知之

○諭常清等奏回匪肆擾失陷三城伊犁危急一摺新疆回匪滋事占踞庫車喀喇沙爾並陷烏魯木齊漢城圍攻滿城賊勢甚熾因思新疆回匪與甘省逆回聲氣相通難保不暗中勾結擾及關內都興阿勦辦甘回雖入境以來屢獲勝仗不振軍聲而所部究形單薄若新疆回匪與甘回潛通意圖窺伺則分兵堵勦必致臨時掣肘難於分應不可不豫爲籌備以厚兵力陝西藍逆一股見已敗竄南山軍務已有起色劉蓉以巡撫帶兵事權專一足可勦辦卽責令該撫將此股敗匪悉數殲除穆圖善前有請回湖北勦賊之語具見勇往任事甚屬可嘉此時鄂省兵力厚於甘省而甘省軍情較鄂省尤爲緊要卽著該將軍統帶所部馬步各營兼程馳往甘省會同都興阿雷正綰妥籌勦辦並著駱秉章於川省得力兵勇挑選數千籌備軍裝口糧揀派知兵大員統帶前赴都興

阿軍營聽候調遣藍逆竄入南山恐其乘隙窺川又成滋蔓駱秉
章當飭沿邊將士妥爲防範毋稍疏懈新疆一帶偏地回氛恐其
愈偏愈東入關滋擾恩麟當督飭員弁勤加偵探先事防維不可
稍涉大意將此由六百里諭知都興阿穆圖善駱秉章雷正綱劉
蓉並傳諭恩麟知之○諭前因新疆回氛不靖屢經諭令楊岳斌
南帶所部馳赴陝甘督出都興阿帶兵出關勦賊本日據常清奏
庫車及喀喇沙爾兩城被回匪占踞後兇燄大張六月十二日烏
魯木齊漢城失守滿城被圍伊犁民心震動防勦兼籌情形萬分
危急請速調大兵前來援救各等語伊犁兵單餉絀而回匪變起
倉卒連陷三城賊氛甚熾若不迅速往援後患不堪設想都興阿
一軍已抵甯夏之花馬池距關較近惟該將軍所部人數無多且

江右連復五城賊鋒大挫軍務較鬆楊岳斌務當懷遵前旨酌帶勁兵數千剋日起程赴甘會合雷正紹等軍將該處回氛迅速埽蕩以副委任鮑超一至江省卽奏奇勳實屬奮勇可嘉沈葆楨當會同鮑超及劉典等督率諸軍將敗殘餘匪一氣剿除淨盡毋令擾及閩疆又成不了之局楊岳斌兵赴甘後江皖一帶如有必須添兵防勦之處著曾國藩斟酌情形妥籌調派毋稍疏忽將此由六百里諭知曾國藩楊岳斌沈葆楨並傳諭鮑超劉典知之○辛未諭內閣都興阿奏甘省難回過多請派大員查辦妥爲安置一摺據稱陝西回眾前經大兵勦辦望風逃入甘省自平涼固原鹽茶收復後兇悍之徒多就誅滅其餘被脅之眾扶老攜幼尙不下數萬人甘省無從安插見經署臬司楊炳鐸等飭令該頭目等查明籍貫人數造具清冊請派大員赴甘查明准將該回眾解回陝

西原舊安插等語前因陝西回匪煽亂荼毒生靈朝廷命將出師無非欲除暴安良登斯民於衽席疊經諭令統兵大臣但分夏勢不分漢回初未嘗因回民中偶有逞兇藐法之人卽將安分良回概行誅戮茲據都興阿奏稱陝省回民逃入甘省者其中被脅難回尙有數萬此等回民大率因大兵進剿惑於奸回謠言被其僞脅紛紛遠竄此時天戈所指疊克堅城悍黨業就殲戮而該難回等蕩析離居嗷嗷待哺朝廷一視同仁豈忍令數萬生靈展轉消墮因思此等回眾籍隸陝西者已數百年與該省漢民相安已久且邱墓田廬均在原籍該回眾等自必樂歸故土卽該省漢民亦斷不至因遭逆回荼毒致與安分良回稍存嫌隙總之漢民回民皆吾赤子初未嘗稍存歧視該地方官果能宣布朝廷德意使漢回居民各安生業永息爭端民雖至愚豈有不爲感悟之理著派

陝西按察使張集馨馳赴甘肅將陝省難回詳細查明如實係私
賊偪脣見已投誠者概准免罪其有原籍可歸者卽分別解回安
插並著劉蓉於此起回民回籍時酌量情形妥爲安置飭該回眾
等回籍後仍敢懷疑構讐不遵約束或漢民中有意存歧視逞忿
尋仇者均著該地方官分別從嚴懲辦該督撫卽刊刻榜黃徧行
曉諭用示朝廷胞與爲懷秉公辦理至意○諭議政王軍機大臣
等都興阿奏官軍連獲大捷攻克寶豐縣城固鹽收撫回眾過多
安插爲難請派大員來甘查辦並飭恩麟妥籌守禦行知阿拉善
王等將應派蒙兵暫緩派往各摺片杜嘎爾督軍深入沙礦背水
成軍旬日之間連獲五捷立將寶豐縣城攻克實屬勇敢有爲勦
勞懋著卽著都興阿飭令杜嘎爾統帶各軍節節進剿以竟全功
甯靈地廣賊眾該將軍務當嚴飭各軍穩慎圖功毋稍大意陶茂

林一軍進剿張家川賊匪近日接仗情形未據雷正綰奏報殊深
屢繫著雷正綰卽飭噶茂林激勵將士迅速掃蕩以孤賊氣平涼
雖經克復西北逆氛尙熾雷正綰當督率所部各軍相機進剿俾
賊匪有所牽制不敢赴援甯靈是爲至要恩麟防守省垣並著督
飭將士扼要駐守不可以狃於撫議稍涉鬆勁鹽固回匪就撫本
日已明降諭旨准予投誠免罪並派張集馨前赴甘省查辦惟據
該將軍奏稱降眾不下數萬甘省漢回仇隙已深無從安插必須
遣回陝首本業方可設法安置所奏自係實在情形張
集馨接奉此旨卽著迅赴甘省悉心籌畫安爲辦理前據張集馨
奏西同兩府概不准回逆復回再行入境以杜釁端等語原爲保
衛閭閻起見見在就撫回數甚多若不准其還籍復業難保不別
生事端張集馨辦理此事母得膠執己見惟當分良莠不分漢回

如果該回眾真心反正卽派員查明該回人原籍州縣陸續護送回籍俾復故業該回到陝後著劉蓉妥爲安插母致失所該降人等經此次特恩免罪務各洗心革面永安生計儻敢別滋事端卽著從重懲辦陝省漢民亦不得與回人尋仇啟釁致生枝節如敢故違卽著隨時認真懲辦毋稍寬縱發去諭旨一道著都興阿劉容刊刻謄責宣布德意伊克昭盟長固山貝子巴達爾呼應派亢金鄂多克二旗兵一百名著都興阿飭令嚴防本境毋庸派往助勦沿途運送車火米糧仍飭鄂爾多斯各該旗豫備駝隻妥爲護送將此由六百里諭知都興阿雷正綰劉蓉並傳諭恩麟張集馨知之○諭明緒奏回匪肆擾連陷三城見擬統帶蒙古官兵赴伊會商軍務並請將塔城回漢掌敎鄉約等賞給頂帶及行文俄國准照議單分界各摺片所奏回匪變亂情形與昨日常清摺報大

略相同惟西路兵單餉絀變起倉卒籌辦防勦萬分棘手明緒此次所帶察哈爾厄魯特等弁兵五百名並巴霞管帶之土爾扈特兵五百名籌備鹽菜口糧已屬左支右絀兼之軍火器械亦不齊全殊難望其禦侮著明緒再於塔爾巴哈台存畱軍器內酌量添撥或於見在無事各城撥給若干俾榮全妥爲駕馭以利軍行想該大臣必能斟酌辦理也回民掌教石金斗鄉約陳生福等既能稽查匪徒彈壓回眾始終不懈自應量予恩施石金斗著賞給五品頂帶陳生福海玉珍著賞給六品頂帶馬義等十名蔡以涵等四名均著賞給空金頂以示獎勵明緒見赴伊犁卽著錫霖博勒果素等宣布朝廷德意將止分良莠不分漢回辦法妥爲撫輯俾漢回永遠相安毋令他處回匪潛來塔城煽惑滋事伊犁爲各城領袖常清身膺疆寄責無旁貸務當與明緒統籌熟計就見有兵

力及調到各軍實力防勦烏魯木齊滿城危急平瑞等當力籌守
禦迅解城圍毋稍疏懈麟興車林敦多布恪遵昨日諭旨將應調
喀爾喀蒙兵會商科布多辦事大臣速行調派前赴烏城以厚兵
力此時新疆地方回氛猖獗而俄國兵隊又節節移近吐爾根河
西駐紮強占卡內地方明緒等以內憂外患相逼而來已行文西
悉畢爾衙門准照該國議單分界將來俄使到塔明誼錫霖等務
當妥爲辦理迅速定界以安人心將此由六百里各諭令知之○
王申諭議政王軍機大臣等官文奏官軍約期會勦連獲勝仗並
派兵豫扼黃孝要隘一摺另片奏攻克銀家官塘等賊壘並克白
果老巢等語七月十九等日成大吉等三面進攻白果及夫子河
等處更捻楊朝林等率軍橫攻將沙河等處賊壘蹋平多座該逆
奔逃無路伏匿於銀家官塘三角灣壘內姜玉順等進勦密耳山

大股賊匪亦獲大捷賊向鵝籠司安家寨等處北走其中館驛聚
賊亦經姜玉順等擊敗髮逆馬融和等竄蘄水縣屬之關口蔡家
河一帶梁洪勝等鈔入賊館頗有斬擒二十一日各軍將銀家官
塘等處賊壘悉數毀平並克白果老巢餘匪東西分竄蔡家河及
淨瓶山等處官文已飛咨僧格林沁等會合夾擊著僧格林沁督
飭馬步各軍將麻城賊匪認真勦洗其竄光山新集之賊趨向未
定僧格林沁見駐光州諒可確探賊蹤派兵迎擊張之萬責任封
圻亦不得坐視逆匪闖入並著於光羅等境嚴密防勦毋稍疏忽
賊蹤飄忽靡常恐不得志於楚豫將犯皖疆會國藩喬松年當督
飭派出前敵各軍遇賊卽擊如防勦不力查由何路入境卽將派
防之帶兵官嚴行參處或仍圖由舊路回陝卽著劉蓉李雲麟扼
要設防以杜回竄見在由白果山內東竄之賊由大切小切竄蔡

家河等處鵝籠司安家寨各賊股尙未盡除是楚北賊氛仍熾未可稍涉鬆勁官文當指揮各軍多設偵探視賊所向跟蹤躡勦未可復任擾及完善致滋蔓延正在寄諭間據張之萬等奏豫軍會剿麻城獲勝並擒獲汝正新息境內餘匪一摺麻城之賊如敗竄東北卽係豫之商城地面曇經諭令張之萬派兵防堵見經僧格林沁派令張曜徐連陞所部前往商城駐紮著張之萬嚴飭該總兵等實力守禦如能出境迎擊更勝於本境設防如由黃孝折而西北卽是豫省之信陽羅山著卽飭令派出之張士元馳赴信羅嚴扼要隘其荆子關一路毗連陝境陝賊未靖仍應加意防範毋稍大意汝正新息餘匪時名書等解營正法辦理尙爲認眞此外餘匪難保不潛匿各處仍圖煽亂著張之萬毛昶熙督飭趙鴻舉等認眞按捕務須淨絕根株毋畱後患將此由六百里各諭令知

之○癸酉諭議政王宣機大臣等譚廷襄奏汶河戴村等處壩工
請旨辦理一摺據稱東平州戴村壩遏汶入運該處有玲瓏亂石
滾水各石壩相連又有三合土壩均爲遏汶而設見在玲瓏石壩
閒有損壞土壩衝成決口汶水洩入鹽河運道日形淤淺覈實估
計補修玲瓏石壩需實銀四千五百兩折修三合土壩需實銀一
萬五千三百餘兩如照部咨卽在每年歲搶修並咨案酌減實銀
內撥給則全河坐廢如欲彼此俱爲覈減勢成兩誤請旨辦理等
語此項壩工關繫極爲緊要如將就了事旋修旋決勞費將無已
時卽據該河督奏稱就見時籌得實銀加以藩運兩庫再爲續籌
或將兗沂道庫存儲河銀酌量提用均可集事著照譚廷襄所請
就見籌各款辦理無庸照部議在每年歲搶修並咨案酌減實銀
內撥給並著該河督嚴飭承修各員認真興築限令汛前辦竣務

期工堅料實母得稍涉草率致誤要工將此諭令知之○諭恩麟
奏隴西漢回民圍互相戕害同城文武稟報兩歧一摺甘肅隴西
縣西鄉武生李耀榮等聚眾萬餘名爲海團圍攻鞏昌府城由西
關城入與回民互相戕害署遊擊周勝近在同城何以所稟海團
來城焚殺情節與該府知府斌越等率多兩歧至西鄉海團與府
城回民究竟平日因何結怨並因何事啟釁均著恩麟確切查明
據寶具奏該護督見派都司鄒玉標所帶調省黔勇八百名畱駐
鞏昌並經林之望添派勇目文象奎帶黔勇一千二百名馳援卽
著恩麟檄飭林之望統率兵勇將一切防勦事宜妥爲籌辦俾鞏
城速臻安謐母令再行滋擾知府斌越等辦理不善實屬咎無可
辭至誘執團首李耀榮等欲行正法尤難保無殺團媚回情事代
理隴西縣知縣黃國錦著先行革職鞏昌府知府斌越著一併撤

任恩麟卽督飭林之望徹底根究嚴行懲辦回疆匪勢鴉張軍情
萬分危急亟須添撥勁旅以資埽蕩著都興阿雷正綱懷遠等次
諭旨將甯靈等處賊匪迅速殄滅庶可騰出兵力勦辦新疆之匪
新疆回逆如入關暗圖勾結與甘省回匪聯絡一氣防勦愈形棘
手著都興阿雷正綱酌度情形調派精兵嚴扼要隘使口外之賊
與口內之賊不能勾串聯爲一氣方爲妥善俟川陝兵到再行派
員統帶進剿將此由六百里諭知都興阿雷正綱並傳諭恩麟知
之○諭慶昀等奏杜嘎爾援兵從鈕家溝渡河與賊接仗獲勝應
卽遵照前旨妥籌夾擊惟城防不容稍鬆兵丁不能多撥又甯郡
迪南之納家牖王家園莊兩處爲逆首納家牖萬鑑占踞與郡城爲掎
角之助擬派團首入山招集數百人湊合官軍共千名以上卽由
常陞統帶先將納家牖之賊與郡城劃而爲二等語杜嘎爾之軍

渡河後五戰皆捷並克寶豐縣城北路援兵軍威不振該將軍等
擬先攻郡南之納家膚賊巢亦牽制賊勢之一法杜嘎爾之兵如
已進攻甯郡卽著常陞迅帶所撥兵勇嚴斷該逆往來道路疏通
郡南各鄉堡逕糧要道使賊兼顧不遑一面飭令平羅縣知縣長
謙多備雲梯攻具以備杜嘎爾援軍進攻之用並卽嚴檄梁生嶽
將中衛靖遠一路要隘嚴密扼守遏賊西竄並將西路援賊力籌
堵截以分賊勢慶均仍將滿城守禦妥籌布置毋稍疏虞將此由
五百里各諭令知之○諭保恆奏賊勢猖獗官軍挫失自請議處
並請飭派署哈密印務各摺片古城逆匪糾眾滋擾經官軍擊退
後餘匪盤踞濟木薩泉子西南山依險紮營保恆派協領巴哈布
等督率滿營會同古城綠營官兵暨知縣文光所帶民勇等分路
進剿遇賊接仗頗有斬擒賊眾大亂奔潰因山路崎嶇時已薄暮

卽行收隊詎文光管帶在東西兩溝堵禦之民勇見賊敗竄貪取財物舍營直擣賊巢致被賊隊四面圍攻由中溝敗回將官軍隊伍衝亂該逆乘勢繞出谷口從後夾攻官軍腹背受敵亦卽敗亂傷亡及遺失軍械甚多見在逆氛甚熾計已蔓延山外該城兵勇新經挫衄防勦更形喫緊亟須添撥勁旅赴援以厚兵力著麟興車林敦多布懷遵前諭卽行飛札前調蒙古部落盟長挑選精壯官兵五百名配發軍火星速馳赴古城並著廣鳳奎昌於科布多屯防蒙古官兵內迅速揀調精銳二千名懷遵前次諭旨配合軍火器械星馳赴援古城毋得稍有稽延致誤事機常清統轄各城值此匪蹤肆擾豈得莫展一籌束手坐視前經諭令平瑞等籌商如就近各城中有精壯兵勇可資調派卽一面奏聞一面分撥仍著常清平瑞遵照前旨迅籌辦理烏魯木齊漢城被陷平瑞固守

滿城惟當激勵存防守兵嚴行守禦以待援軍麟興車林敦多布廣鳳奎昌迅將前日諭撥之喀爾喀官兵卽行儘數調派馳援保恆因聯捷未到未能卽赴哈密著平瑞悉心籌畫如烏垣有可派往接署之員卽行委赴哈密接受印務文祥卽可馳赴古城與保恆籌勦該處逆匪以次進援迪化均著平瑞文祥妥籌商辦保恆於所派員弁進剿回逆未能先事妥籌以致傷兵失械咎無可辭著先行交部議處協領巴哈布佐領德壽尙阿本驍騎校訥爾精額前任奇台縣知縣文光濟木薩營參將倭賀縣丞陶玥著一併交部覈議分別按律懲辦正在寄諭聞據恩麟馳奏六月十九等日奇台漢回構亂回匪逃竄古城將街道全行焚燒傷斃民人一千餘名刻下圍困滿漢二城萬分喫緊又迪化回匪於六月十二日將烏垣漢城焚毀業布沖額已被戕害平瑞帶領滿兵在紅山

臂接仗幾至失利逆燄方張已成不可撲滅之勢請飭烏科二城
迅速派兵援勦等語著麟興車林敦多布廣鳳奎昌於接到此旨
時迅卽遵照調撥馳赴烏魯木齊古城以資援勦儻敢稍涉觀望
貽誤戎機必將麟興等從重懲處業布沖額被害暨烏魯木齊漢
城失陷詳細情形並著常清平瑞查明馳奏將此由六百里各諭
令知之○諭新疆地方緊要近來簡放各城大臣除哈密辦事大
臣保恒本在古城即可赴任烏什幫辦大臣伊昌阿在都興阿軍
營外新授伊犁領隊大臣阿隆阿烏魯木齊領隊大臣德克吉納
巴里坤領隊大臣訥爾濟吐魯番領隊大臣扎克當阿古城領隊
大臣聯捷庫爾喀喇烏蘇領隊大臣惠慶葉爾羌幫辦大臣常續
喀什噶爾辦事大臣常明和闐辦事大臣奎章烏什辦事大臣慶
明阿克蘇辦事大臣崇恩哈密幫辦大臣明瑤先後奉旨簡放爲

日已久俱尙未據報抵任新疆回匪紛紛變亂占踞多城軍務正當喫緊各該大臣均有統兵防勦彈壓撫綏之責豈容任意延玩節節逗留著阿克敦布劉長佑沈桂芬於接奉此旨後查明各該大臣見在行抵何處卽傳知迅速趨程前進毋許再有稽延如有託故不前藉詞延宕者卽指名奏參毋稍瞻徇將此由六百里各諭令知之○和潤以病免以毓祿爲工部右侍郎由內閣學士遷○予浙江殉難內務府六品司庫繩曾等祭葬世職○甲戌李鴻章奏自潘鼎新攻克犧舍賊壘東岸賊營皆潰潘鼎新乘勝進擊犧舍劉秉璋由吳湧楊漢福率湖東要隘張樹聲又由南潯進擊織里各營連日出隊屢有斬擒臣聞湖州賊勢趨重四安飛催劉銘傳等乘機蹙之劉銘傳已親督黃桂蘭等先赴建平至廣德一路布置劉盛藻等軍陸續繼進至湖州西面尹隆橋大德橋一帶爲迺四

安廣德大道該逆聯營以護竄路

臣飭郭松林等由呂山進攻尹

隨將扼其要害王永勝等營與賊對紮該逆於南岸築壘十餘座

復添築濠牆二道郭松林等連夜趕築長牆調劉玉龍開花礮隊

轟擊自七月十五日至十七日廖德旺等率眾猛攻哨官張祖述

死之高占虎舒義志等皆受重傷郭松林等激勵眾軍鼓勇齊進

並飭呂山大德橋各營嚴截援賊開花礮轟缺賊卡一處眾勇各

負蘆柴一束填塞賊濠王永勝督隊在前郭松林楊鼎勳督後一

呼猛進直抵內濠郭松林揮令急進被槍子中傷左膀正欲踰濠

登壘因大雨驟至收隊回營湖城賊首堵逆黃汶金復挑悍賊數

千繞呂山後路八字橋阻我糧道十九日郭松林派李長樂等搶

築營壘賊眾由洞子門來撲我軍迎戰斃賊甚夥參將何錫恩死

之各軍憤極齊上賊遂潰退二十日湖賊大隊自尹隆橋接連八

字橋一帶二十餘里傾巢來爭郭松林飛調易用剛等迎敵自督
李長樂等斷後劉士奇等由呂山夾擊楊鼎勳督守尹隆橋老營
賊眾衝至易用剛整隊接戰被礮轟擊受傷甚重郭松林等捲旗
突入來往縱橫並飭王平西礮船由河內助轟斃賊無數王永勝
等由山脊翻下疾如風雨逆眾紛竄陣斬僞列王黃十四乘勢掩
殺擒斬數千名弁兵亦傷亡百餘名臣聞賊眾皆趨西路有欲竄
之勢飛飭潘鼎新劉秉璋等進攻二十六日夜昇山守逆棄壘先
走潘鼎新會合浙軍劉樹元等追勦次日追至八里店該逆回拒
水陸各軍大破之該逆望風狂奔李朝斌劉秉璋張樹聲等各攻
毀賊營十餘座追至城下沿途殺斃淹斃賊匪無算敗賊擁擠入
城閉門不及潘鼎新等奮勇先登由東門而入遂於是日克復湖
州府城潘鼎新兒已會同浙軍入城布置臣即飛飭郭松林等由

西安中路截勦劉銘傳等由廣德前路兜勦

上諭內閣李鴻章

奏官軍克復湖州府城一摺勦辦甚爲得手著左宗棠李鴻章督

飭蘇浙各軍將潰竄之賊分投追捕悉數殲除尤爲出力之提督

李朝斌謀勇兼優所向無前著發去白玉四喜搬指一箇玉柄小

刀一把火鎌一把大荷包一對小荷包二箇交李朝斌祇領道員

潘鼎新督隊苦戰克復名城著賞穿黃馬褂翰林院侍講劉秉璋

躬冒矢石治軍整嚴著賞給振勇巴圖魯名號遇有應升之缺開

列在前道員張樹聲堅忍百戰積功甚多著賞給二品頂戴以按

察使遇缺提奏用示優獎署福建陸路提督郭松林奮勇勦賊左

膀受傷著先行交部從優議敘仍著俟廣德西安克復後由李鴻

章查明勞績與提督劉銘傳等一併從優保奏○諭議政王軍機

大臣等李鴻章奏官軍進攻西安廣德連獲勝仗乘勢克復湖州

府城一場湖州之賊經蘇浙兩省官軍逼勦屢次獲勝賊勢趨重
四安一路劉銘傳郭松林等分路進勦而湖州西面之尹隆橋一
帶復經官軍攻開賊卡堵逆黃汝金等被擊西趨潘鼎新等會合
浙軍併力夾擊節節進逼於七月二十七日克復府城覽奏甚爲
嘉悅湖州一城爲髮逆悍黨羣聚之所見在雖經收復而羣賊一
日不盡終成不了之局且堵逆尤爲著名悍賊洪幼逆復潛入其
中難保不紛竄旁趨希圖免脫湖州西通四安毗連廣德該逆既
節節築壘護其竄路是蓄意謀竄已非一日李鴻章旣飭劉盛藻
馳抵廣德卽著督令派出之軍迎頭截擊並將四安廣德迅圖克
復使該逆無可駐足自當易於翦滅郭松林屢著戰績此次因奮
勇勦賊身受槍傷著傳旨存問勦其力疾殺賊以竟全功左宗棠
亦當飭在事諸軍迅速追勦敗匪盡行殲除以絕根株餘匪若由

廣德上犯則徽甯一帶又形喫緊著曾國藩迅派得力將弁會同
李鴻章所派之軍合力扼擊毋令逆蹤上竄以保皖南大局將此
由六百里各諭令知之○予浙江陣亡參將何錫恩遊擊張祖述
安徽殉難知縣朱丙林祭葬世職○乙亥諭內閣會國藩奏停止
廣東釐金請加廣該省文武鄉試中額一摺前因浙江江蘇安徽
三省軍餉支紓經曾國藩奏請開辦廣東釐金三成畱辦本省防
勦七成協解江皖見計自同治元年七月起截至同治三年八月
止除畱歸該省軍需局外前後約解過軍餉銀一百二十萬兩該
省商民踊躍輸將集成鉅款俾江甯各軍藉得迅速成功實屬好
義急公有裨大局著照該大臣所請加廣廣東文武鄉試永遠中
額各四名以示鼓勵見在江甯既克各軍已議陸續裁撤該大臣
奏請停止廣東釐捐自係爲體恤商民起見惟裁勇之欠餉征兵

之口糧需款仍鉅自應將該省釐金暫行照舊辦理以裕餉源俟各營餉項稍充再由該大臣奏請停辦○曾國藩奏欽奉諭旨以裁撤兵勇雖爲節餉起見然驟撤三四萬人恐此輩久在戎行不能省事等因

臣

以欠餉太鉅久思大加裁撤以節糜費嗣與曾國

荃酌定將金陵全軍五萬人裁撤一半查湘勇召募之初選擇鄉里農民有業者多無根者少但使欠餉有著當可安靜回籍不至別生枝節至挑補兵額之說近多建此議者

臣竊不以爲然蓋勇

丁之口糧一倍於馬兵三倍於守兵馬糧之缺極少守糧月支一

兩斷不足供衣食之需誰願數千里外補一衣食不敷之缺其情

願者皆游惰無歸者也

臣

愚以爲勇則遣回原籍兵則另募土著

庶爲經久可行又欽奉諭旨以洪幅頃積薪自焚茫無實據似已逃出令查明具奏

臣

初聞金陵克復亦深慮城大必多竄逸難民

追殺淨盡之說未敢深信迨至江甯經由東壩建平各州縣地方文武並未報有賊股竄過證以李秀城親供逸出漏網之賊似不甚多其洪幅瑱果否尙存臣已派蓄髮降卒赴湖州賊營訪查應俟查明實在下落續行具奏又奏江西之賊占踞許灘者爲僞據

王汪海洋經鮑超破其長濠殺賊數萬分踞東鄉金谿者爲僞聽王陳炳汝懾我許灣之戰遂棄東鄉金谿兩城陸續退遁率眾求撫據鮑超寄到陳炳汝投誠之稟共有黨眾六萬餘人洋槍隊七千餘人皆願效順等語分踞崇仁宜黃之賊爲僞侍王李逆經江忠朝等次第克復踞南豐之賊爲僞涪王譚逆亦經鮑超克復一切調度想經楊岳斌沈葆楨詳奏前欽奉諭旨飭臣酌派金陵陸師赴江協勦刻下江西軍威大振無須添派援兵臣所慮者在皖南廣德一路金陵之師急切不能啟程應遣撤者無由籌給欠餉

應出勦者無由籌發行糧不料老巢既破而餉絀若此皆臣經理
不善之咎也 上諭議政王軍機大臣等金陵大功雖已告成而
裁兵之欠餉與出勦之行糧正煩籌畫會國藩見派江蘇官紳赴
滬勸捐並函商李鴻章酌分松滬釐金殊恐緩不濟急本日已於
明發諭旨內令將粵釐暫緩停止並寄諭毛鴻賓等照舊籌解計
會國藩軍營有此一款源源撥運自可稍濟兵糈李鴻章仍當督
飭官紳將勦捐抽釐等事認真籌辦務令涓滴歸公以資協濟裁
撤勇丁爲善後第一要務既據會國藩奏稱湘勇有業者多無根
者少但使欠餉有著當可安靜回籍卽著責成該大臣安速辦理
母令游惰無歸別生枝節至挑補兵額一節旣屬窒礙難行卽著
照該大臣勇則遣回原籍兵則另募土著之議次第擘畫以期經
久可行洪幅頃取殘之餘即使其人尚在亦屬無能爲役惟該逆

僭稱僞號刻有金玉爲璽非其餘賊酉可比其存亡實在下落必應查究明確方足以靖人心而弭後患仍著曾國藩詳細訪查務得確據此時湖州已復該逆曾否竄入湖城不難查訪而知並著左宗棠一體查明具奏至金陵逸賊旣據曾國藩奏稱漏網者至多不過數百所有在防將士均著免其查參以勵有功聽逆陳炳文率眾求撫自係懾於軍威勉思效順惟黨眾有六萬餘人洋槍隊七千餘人爲數太多安置遣散均不易辦楊岳斌當督飭鮑超察看眞僞安籌辦理不可稍涉大意見在辦理情形及汪海洋譚逆李逆等蹤迹楊岳斌如尙未帶兵赴甘卽著曾國藩迅速詳細具奏湖北之賊尙盤結羅田麻城一帶曾國藩當會商喬松年將皖北防守事宜嚴密布置其皖南廣德一路防勦尤關緊要著迅派得力陸師籌給餉項飭令剋日起程扼要駐紮會同李鴻

章派撥弁兵迎勦竄賊毋稍延玩將此由六百里各諭令知之○
諭曾國藩奏停止廣東釐金一摺見在江甯省城雖經克復曾國
藩軍營欠發遣勇餉項暨征兵行糧爲數甚鉅且該省餘匪未淨
尚需撥兵防勦需餉浩繁若將此項釐金遽行停止深恐餉項不
繼籌辦又形棘手毛鴻賓等辦理釐金向能不分畛域接濟鄰封
該省商民亦能踊躍急公有裨軍務著毛鴻賓郭嵩焘督飭該局
員等照舊徵收並仍照原定章程以三成畱作本省軍需以七成
撥解皖營俟江蘇上海等處籌定款項足敷接濟皖營之用再行
停止解往將此由六百里各諭令知之○諭吳棠奏東民侵占銅
沛民田見在勦逐一摺據稱銅山沛縣境內之微山湖濱新淤地
畝前有山東魚臺鉅野一帶災民遷避開墾湖荒並無民田迨後
另有東民潛至沛縣境內占種民地冊名新園與沛民時有搶割

爭鬪之案屢經驅逐不去六月初三日突有新團裔匪糾眾搶入沛境劉莊寨殺傷人口等語山東民人始因避水徙入銅沛境內開墾湖濱間田自謀生業尙屬情有可矜乃另來東民占種民地膽敢刦立新團名目糾集匪黨劫寨殺人實屬目無法紀且有私築新團各圩濠深圩固抗拒官軍若不迅速勦辦何以除橫暴而安善良兒在吳某已派徐州鎮道等帶兵勦逐將新團各圩平毀餘匪逃往西北新團兩圩著吳棠飭令派出各員弁實力追勦盡殲醜類將所立新團各圩一律平毀毋令逸匪逃逸其從前開墾湖荒之東民如查明實係開種閒田無礙本境民人生計且能安分謀生不至別滋事端卽著飭令該管地方官編成戶籍責令按地升科輸租執業儻查有侵占民田及勾通新匪情事卽立加鞭逐母任逗畱生事庶不至貽患將來山東教會各匪甫經蕩平難

保無逸出匪徒竄入其中希圖嘯聚江南銅沛一帶與山東兗沂
曹各屬地界毗連此股匪徒雖經官軍勦散而此拏彼竄終爲地
方之害著聞敬銘督飭山東江南交界處所地方文武各官遇有
前項逸匪務當不分畛域立即掩捕盡法懲治以淨根株將此由
五百里各諭令知之○丙子諭內閣官文奏懇恩將嫡堂弟一併
賞入正白旗滿洲旗籍等語大學士湖廣總督官文前因克復江
甯省城懋著勳勞降旨加恩將其本支擡入正白旗滿洲母庸仍
隸內務府旗籍茲據奏稱該督因乏子嗣以嫡堂弟內務府衣庫
六品庫掌官廣之次子榮綵承繼爲嗣懇恩將榮綵之生父官廣
並官廣之胞兄官永一併賞入正白旗滿洲等語向來奉特旨將
本支擡旗僅指本身及其子孫而言卽同胞兄弟不得隨同擡入
他旗誠以世系蟬聯而下旁支卽不能連及榮綵雖經過繼官文

爲嗣其本生父官廣及官廣之胞兄官永均著與官文之胞弟胞姪不准一併擡旗○諭前據沈葆楨奏道員周汝筠稟許知縣石昌猷袒匪殺良請派大員審辦當經降旨交曾國藩提審茲據曾國藩審明定擬具奏此案江西前署南康縣知縣升任督糧道周汝筠因在署縣任內奉文辦理防勦事務借捐助餉任用許高鴻楊韶九等遂令倚勢勒捐罰產逼髡多命並有誣人爲匪各情屢次經人控告周汝筠皆爲曲庇致招物議該員卸任後經前任江西布政使李桓屬令後任南康縣知縣石昌猷將周汝筠劣蹟詳查而石昌猷刻意搜求誣列多款以重其罪於拏辦許高鴻楊韶九時並將許高鴻之父許觀國獲案倡令呈送忤逆將許高鴻正法梟示任聽勇丁殘毀屍骸又不釋放其父復查拏其母捕其家屬追取田產充公直以叛逆治之至張書燁楊韶九尋仇互控兩

相搶奪與此案本不相涉因許高鴻被殺後楊韶九往憇周汝筠
該員遂併爲一案指張書燁爲匪卽以石昌猷袒匪殺良民稟見
經審明許高鴻平日倚勢害命藉局吞財業經正法著無庸議石
昌猷於此案並不悉心研鞫按律懲辦乃偏令許高鴻之父呈送
忤逆加以極刑又復株連籍沒致有罪之誅轉同枉殺意存傾陷
審辦矯誣業經革職著發往新疆充當苦差遇赦永遠不准援免
周汝筠雖無擅殺人犯受贓侵餉情事而偏信小人勒捐濫罰殃
及無辜罪有應得惟念該員前此辦團勦賊保障江西南路曾著
功績著從寬拔去花翎革去厯保道員知府等官以知縣降補革
生楊韶九因與張書燁積有嫌隙屢行陷害搶擾並稟請查拏張
書燁父子株累張姓多人實屬非常傾險著發極邊足四千里充
軍到配折賣安置張書燁於查拏楊韶九之際意存報復乘便搶

尊楊姓多家亦屬有干法律業已身死著無庸議沈葆楨辦理此案雖意在急於除惡惟因石昌猷呈守忤逆一言率令回縣速辦致石昌猷得將許高鴻一犯專殺非尋常疏忽可比李桓因聞周汝筠苛政病民密令石昌猷並責其復固是正辦惟於石昌猷覆稟周汝筠得受典商賊銀等款概置不問輒將不應立決之忤逆一欵草率定案並函令石昌猷於請將許高鴻正法之稟刪去奉某札諭等字句不必具稟總督等語措置未能正大實屬不合沈葆楨李桓著交部分別議處尋議沈葆楨降二級畱任准其抵銷李桓降三級調用不准抵銷從之○左宗棠奏自蔣益澧馳抵菱湖後冒暑屢戰賊惟憑壘堅拒七月初二日蔣益澧於思溪雙福橋之間搶搭浮橋以通蔡元吉各營糧道副將徐文秀等馳至蔣益澧卽飭提督劉清亮等攻思溪徐文秀等繼之總兵劉樹元各

營及洋將實德棟等攻雙福橋蔣益澧自率親兵及提督高連陞等分兩隊嚴陣以待飭洋將德克碑率花勇沿河助戰並以淺水輪船載開花礮泊於河汊對思溪八角亭賊壘轟擊各營甫至中流賊壘洋槍齊發勇丁受傷多名副將蔣榮彩等仍奮勇前進爭先搶入至離岸不遠賊礮愈密勇丁傷亡愈多蔣榮彩黃鎮湘彭開壽李世祥均受重傷蔣益澧復用划飛渡德克碑及李連榮過河攻擊遇伏賊槍礮而卻其劉清亮等會攻思溪賊壘亦未得手蔣益澧因思溪雙福橋等處勢難力攻擬由袁家匯荻港出湖蚨漾徑襲逆賊後路初六初七等日高連陞等進纂荻港之中洲蔣益澧親赴荻港督戰官軍一齊猛進立將踞街逆黨殲除殆盡劉連陞師船乘勝進攻顧受槍傷蔣益澧亟率大隊馳至賊始駭遁初八日蔣益澧飛調洋將德克碑日意格淺水輪船赴荻港會勦

並令高連陞等一齊衝殺輪船巨礮同時轟發該逆猝不及備各
勇越濠而入立斃悍賊六七百名餘賊溺斃無算將荻港賊壘三
座攻克是夜有賊目譚侍友等率長龍三板戰船十號赴蔣益澧
軍前乞降十一至十三日蔣益澧親督徐文秀等乘師船四十餘
號由荻港繞出太湖會同德克碑日意格由荻港用開花礮轟攻
袁家匯賊壘環攻三時將傍街賊踞房屋轟塌大半斃賊無效當
酣戰時蔡元吉見賊勢趨重袁家匯當挑健勇五百名隨遊擊楊
應龍由思溪突圍而出逆賊層層鈔襲楊應龍奮威衝殺手刃數
賊力竭陣亡蔡元吉所部營官楊成棟向得勝亦歿於陣勇丁僅
衝出百餘人蔣益澧當飭各營竟夜奮攻袁家匯賊壘以掣賊勢
是夜蔡元吉竟從東埠跳水衝出重圍所部勇士及楊應龍營勇
隨同衝出者不及千人飢疲實甚蘇軍及已革道員張景渠等將

辰舍賊巢攻克賊見蔡元吉已經出圍而辰舍又經官軍攻破意氣沮喪思溪雙福等處踞逆均紛紛退竄劉清亮等各率所部乘夜過河大呼殺入約斃千名其迫溺而斃者不計其數當將賊營數十座一律踏毀劉清亮等營已移繁亭子橋進攻長超山踞賊高連陞等水陸各營會同洋將德克碑進攻袁家匯能速奪此兩隘即可徑抵城根臣查湖州地勢守易攻難而蘇軍自克辰舍後李鴻章毅然以攻取廣德州爲已任已得制賊要著大局旣合長圍已成檻獸釜魚遲速有必滅之理旬日以來逃出難民及投誠僞目等皆言僞幼逆因初二日之戰畏懼頗甚逃避廣德州黃汶金遣其弟僞值王黃汝英護之各賊多備乾糧似有急竄之意但恐賊竄甚速防不及防必致蔓延地方幸連接各路咨報江西腹地漸清臣軍之援江者王開琳王德榜兩軍已還駐弋貴之交可

就近調赴婺源馬金一帶與浙師聯絡其黃少春一軍及劉明燈等各營見已飛調移紮嚴州相機分撥以備迎頭攔勦此次力戰陣亡之遊擊楊應龍擬請副將例議卽傷亡之副將蔣榮彩擬請照總兵例議卽其餘傷亡中外各弁勇容俟查明彙案請卽至同知蔡元吉久困重圍忍飢而戰斬擒悍賊最多雖所部傷亡千人應否免其置議之處出自天恩又奏據蔣益澧飛報自官軍偏禁亭子橋等處後七月二十五日湖州府賊僞天將陳學明率千餘人來降次日長超山踞賊僞天將陳姓及姚姓劉姓以所轄三壘之眾來降是日劉樹元會同蘇軍猛攻昇山賊壘拔之曉見湖州城中火光燭天袁家匯賊壘亦有竄動形迹劉樹元已率所部先進蔣益澧亦卽拔隊猛追甫兩時許蔣益澧遣弁飛報湖州踞賊於是夜開西門竄出劉樹元已率所部入城所有收復湖州

追勦竄賊情形容卽查明奏報楊岳斌沈葆楨奏據各營稟稱崇仁旣克卽乘賊驚惶未定進擊宜黃浙江臬司劉典隨派劉大謨等會合進攻逆眾驚惶由小東門衝出逃竄蹂踐死者不計其數各營分投追殺伏屍滿地救出難民數千人餘匪悉遁南豐當於七月十三日將宜黃縣城收復參將韓進春自擊敗上塘竄匪後派董德春等督率各營及建昌練勇協同規取南豐十六日勦破裏塔墟踞匪直逼南豐西北兩門奮力仰攻翌日董德春復與魏高勝等分攻東北兩門賊亦分股抵抗正鏖戰間適鮑超馬隊馳至馬步齊進前任南豐縣知縣莫廷蕃署知縣譚灋亦率練丁協助賊眾大潰由西門擁出分路逃竄各營縱橫截殺斃賊無數卽克復南豐縣城敗匪一竄廣昌大路經王昌全等追勦一竄河東爲霆營馬隊殲斃殆盡臣等查兩城敗匪上竄廣昌甯都已逼南

贛其東鄉金谿敗匪見聚瀘溪新城南贛甯三府州毗連閩粵新
城亦與閩接壤誠恐竄入鄰省且恐湖州敗賊竄江業經檄令鮑
超進剿新瀘防賊入閩總兵王開琳等回駐弋陽貴溪以遏浙西
敗賊並防新瀘之賊敗竄回浙復令精捷營馳赴贛州迎頭截擊
劉典與道員王文瑞等馳赴甯都兜剿臣楊岳斌於十六日自南
豐拔營與劉典會商戰守不日前赴贛甯就近調度但贛甯等處
山嶺崎嶇僻徑歧出尾追深恐不及仍飛催劉典等迅繞賊前擇
要扼截並令席寶田韓進春跟蹤追剿期將羣醜聚殲至此次克
復南豐宜黃出力人員可否容臣等擇尤請獎出自天恩又奏
據吉南贛甯道王文瑞稟稱宜黃股匪竄至槎路口當派鄧榮達
等截擊並令曾聚賢等由葛仙嶺繞赴交湖協防七月十二日鄧
榮達等戰於槎路口大獲勝仗斃賊二百餘人旋聞賊眾將犯樂

安永豐復飛調鄧榮達等赴交湖助戰十三十四等日我軍三路
迎戰連斃先鋒悍賊數百該逆復糾大股來犯爲熊常富等擊敗
我軍追近東陂三路會合包鈔賊眾腹背受敵紛紛敗走自相踐
踏死者無算追殺十餘里斬馘尤多敗匪悉向南豐遁去又據署
甯都州知州郭毓龍稟稱宜黃之賊竄入東陂約萬餘人十六日
直撲北門郭毓龍與參將石玉督兵固守該逆晝夜攻圍經各員
弁督率兵民槍礮齊施約斃賊百餘人賊始退去各等情臣等查
宜黃敗賊屢犯槎路口交湖意在竄越樂安永豐以窺吉郡經王
文瑞三次痛勦足以絕其西向茲復往撲甯都臣等惟當嚴督各
營四面截殺務期聚而殲旃又奏據鮑超文稱該提督克復金谿
後僞聽王陳炳汶僞甯王張學明僞樊王陶金會於七月十一
二等日三次遣陳炳汶之弟陳報林具稟投誠據稱伊等前被廣

西賊匪所擄並非甘心投賊因濂逆汪海洋平逆翟添濶有眾十
數萬人致被欺伏屢欲投誠均爲攔阻今汪海洋賊壘被毀翟添
濶就擒伊等喜無阻滯具稟投誠懇請寬其既往部下人眾尙有
六萬人洋槍隊七千餘人等詰鮑超以陳炳汶等敗伏山谷一經
進剿勢必遁走福建擾害鄰疆旣據悔罪投誠情詞懇切應准免
罪已派總兵洪容海前往飭令雜髮又據參將韓進春稟稱七月
十二日有僞元勳李三畏等率夥黨二千人自金溪萬年橋北赴
營投誠韓進春詳察其意無他卽派兵弁前往曉諭撫慰降眾均
各悅服概行雜髮各等情臣等查鮑超轉戰數省頻摧巨寇收撫
降眾威信素著降人陳炳汶等悔罪投誠深明順逆情實可原自
應仰體皇仁寬其旣往予以自新使他股逆眾聞風向化業經
臣等咨行鮑超妥爲辦理並委員會同查造降眾籍貫清冊發給

護票分別遣散陳炳汶張學明陶金會率眾歸化其志可嘉陳報
林連次來營不避艱險可否分別賞給陳炳汶參將銜張學明陶
金會陳報林游擊銜以資觀感出自 鴻施其韓進春收降李三
畏等一股亦經臣等飭令會同建昌府妥爲遣散頭目李三畏等
暫行酌給六品頂帶畱營效力 上諭楊岳斌沈葆楨奏賊酋率
眾投誠懇恩給獎並畱營效力等語前經朝廷明降諭旨凡被賊
脅而悔罪自新者皆准免死此次陳炳汶等自拔來歸並率六萬
之眾同心反正願納礮械數千件助剿殘匪且據稟從前屢欲投
誠均被濂逆汪海洋所阻濂逆圖犯江西省垣該降眾等未經允
從尙屬真心悔罪若不寬其既往無以昭激勸而廣仁恩陳炳汶
等均著准其投誠陳炳汶並賞給參將銜張學明陶金會陳報林
均賞給遊擊銜李三畏賞給六品頂帶並均准畱營效力此係朝

廷恩施法外予以自新若他股賊眾咸知不殺之仁聞風向化仍
著該督撫等妥爲酌辦○諭議政王軍機大臣等官軍收復宜黃
並南豐縣城亦經霆字等營克復辦理均極得手所有出力人員
著准其擇尤保奏惟敗匪上竄廣昌甯都已逼南贛其東鄉金谿
敗匪見聚瀘溪新城南贛甯三府州毗連閩粵楚南楊岳斌等已
派鮑超進剿新瀘防賊入閩王開琳等回駐弋陽貴溪以備浙西
敗賊勾結楊岳斌不日馳赴贛甯調度著卽飛催劉典等繞出賊
前扼要兜擊並令席寶田等跟蹤追剿以期一鼓聚殲毋任再有
竄逸湖州業經克復浙西敗賊恐復上竄並著責令王開琳王德
榜以勦爲防毋稍疏懈陳炳汶等投誠旣屬真心悔罪自應網開
一匝准予自新所請獎賞參將等銜未免過優惟念該降人等尙
知順逆且以激勸未降各股是以俯如所請楊岳斌等當傳知該

降賊等俾知感奮圖功如續有勞績仍准保獎但其人數在數萬以上概予遣散後患必多是否酌畱效力未據聲明其洋礮等件曾否呈繳均著飭令鮑超等妥爲經理李侍賢汪海洋見在何處此二逆必須殲除方免滋擾鄰省之患宜黃之賊屢犯槎路口交湖經王文瑞三次痛剿茲復往撲甯都著卽催督各軍四面截殺敗匪上竄廣昌甯都已逼南贛若開此一路縱令入粵又成不了之局本日據毛鴻賓等奏請控扼贛南自係目前切要之圖著會國藩楊岳斌等飭令派出各軍繞前截擊務須就地殄除能否增兵繞越甯都石城一帶扼賊南竄並著會國藩等酌度辦理毛鴻賓等亦當派兵出境防堵不得任其闖入其竄甯都之賊與閩省切近左宗棠徐宗幹務飭兵練認真設防遇賊卽擊張運蘭已取道嘉應赴閩卽著令其迅速前進擇要駐紮毋令一賊竄入閩境

毛鴻賓奏勦辦客匪僞軍師戴梓潰一股餘匪退入五阮五阮爲客匪所居山深林密經卓興等進勦獲勝傳言戴逆已死於亂軍之中著該督撫仍飭卓興查明戴梓潰實在下落並將餘匪一併殲滅毋使再有勾結嘉應州石阮堡溫凌等姓因事挾嫌械鬪溫姓子弟復句通揭陽匪首溫亞喬等率黨相助長樂興甯二縣亦有械鬪之事毛鴻賓等已派吳贊誠會同地方官查拏懲辦著卽責令安爲辦結不得草率了事正在寄諭聞左宗棠奏官軍進規湖郡屢次獲勝另片奏據蔣益澧稟報湖州踞賊夜開西門竄出劉樹元已率所部入城等語湖州克復昨已據李鴻章奏報仍著左宗棠將詳細情形查奏洪幅瑱逃避廣德李鴻章所派之軍力攻州城自未可稍涉鬆勁著曾國藩左宗棠李鴻章督飭各軍務將該逆擒獲毋令漏網湖州收復後賊由西門出竄究竟已竄何

處著左宗棠李鴻章查明具奏一面飭令蔣益澧等會同蘇滬各軍躡蹤緊追不得任其紛竄致令死灰復然致勦辦又行棘手四安梅溪等處踞賊尙多李鴻章當飭各軍節節埽蕩以期漸次肅清將此由六百里各諭令知之○諭富明阿奏馳回揚營並請將揚防陸軍暫緩裁撤一摺據奏接據富森保函稱湖北擒獲賊供因麻城一帶無糧可擄聞江北饑富欲於秋涼時大股東下爲就食揚城接援金陵之計所供各情該逆自尙未聞金陵克復之信此時老巢業經攻克江南一律蕩平楚北之賊自必聞風喪膽且屢據官文等奏稱官軍勦辦甚屬得手賊勢已蹙似尙不至大股東趨惟羅田麻城一帶賊蹤趨向未定逆情詭詐難保不因被勦裁撤未免太形空虛且據該將軍奏稱水陸各軍欠餉甚多一時窮蹙復圖竄擾完善是江北之防仍不可稍鬆若遽將各軍概行

難以籌給亦係實在情形著卽照所擬俟水師三批裁竣後卽將
揚防陸軍先爲酌撤數千名以節糜費其餘酌畱若干名暫緩裁
撤仍著認真訓練寶力巡防以期有備無患毋致虛糜餉項所有
揚防各營官弁兵勇從征有年著准其查明尤爲出力者奏請恩
施母許冒濫將此由四百里諭令知之○諭閻敬銘整頓山東營
制○予浙江傷亡副將蔣榮彩陣亡遊擊楊應龍祭葬世職○丁
丑諭議政王軍機大臣等官文奏攻克白果髮逆分股奔竄官軍
跟蹤追擊並各路堵勦情形一摺成大吉姜玉順等克粉壁寨銀
家官塘等賊壘後直擣白果追勦兩晝夜斬殺甚多見在髮捻各
逆分路狂奔尙無定向東竄之賊將與斷水羅田踞匪合夥西竄
之賊已由料棚竄新集距光山不遠大股仍虜聚黃安牽掣楚師
官文已令楊朝林等分道追擊並飛咨僧格林沁截勦著官文嚴

飭各路將領無分漏夜盡力追蹤兜截毋任再有延蔓。督格林沁駐軍光州諒該逆不能偷越著卽偵賊所向派兵兜剿毋任竄入皖豫境內麻城北路賊匪著僧格林沁督飭馬步各軍認真勦洗近日軍情並著隨時馳奏以慰屢繫其分股竄撲黃安之賊業經官紳擊退蘄水之賊擾六神港又由西岸竄陳家灣等處經張啟基礮船擊敗匪向殷家沖山後而遁此股逆匪見竄何處並著官文查明下落飭令在防將士會同地方文武迅圖撲滅以收廓清之效斬水羅田等處之賊趨豫入皖蹤迹不定著喬松年張之萬懷遵初四日諭旨整飭防軍會合楚軍前後夾擊儘令深入定惟該撫等是問汝正新息餘匪未靖毛昶熙當會同張之萬督軍認真搜捕不得稍畱餘孽致貽後患將此由六百里各諭令知之○諭閻敬銘奏逃匪蘇落坤勾結直隸清豐縣逆團馬三黑聚眾滋

事見在辦理情形一摺據稱七月間據直隸大名道祝壇等稟稱有逃匪蘇落坤在山東館陶縣所轄鵠高地方傳帖聚眾又據東昌府及所屬各縣稟報直隸大名府屬清豐縣有團首馬三黑與孫姓尋仇滋事踞寨聚眾旋經兵役勦散又據總兵馮翊翔等稟稱在館陶縣車町村擊獲形迹可疑之薛滿囤投出逆帖一紙係蘇昆岡之名有七月二十六日在該邑之紫家堡廟內聚齊字樣訊係蘇落坤遣往馬三黑處助逆旋經該總兵派兵掩殺餘匪均各逃散各等情奸民馬學孟卽馬三黑怙惡釀命殺斃紳士孫懷珍之子該縣知縣幾被槍刺殞命前經有人奏請查辦諭令劉長佑嚴密確查如閻敬銘所奏逆迹昭著何以劉長佑並無一字奏及直東交界地方素爲盜藪亟應派兵嚴密搜捕以安畿輔著劉長佑閻敬銘查明蘇落坤等犯見在逃匿何處不分畛域務將逃

犯按名弋獲並著劉長佑仍遵前旨將馬三黑與孫姓構戮情形確切查明具奏毋稍含混將此由四百里各諭令知之○諭本日議政王軍機大臣呈進常清咨送具奏冰嶺阻隔官兵改道進剿俄兵強占卡倫請飭總理衙門辦理各城探報回匪肆擾情形請派兵二萬出關進剿各摺片前據各城該大臣馳奏回匪變亂並常清奏逆回肆擾三城伊犁危急各情形疊次諭令常清督飭將士妥籌防勦該將軍諒已陸續接奉寄諭恪遵辦理據奏圖庫爾改道由東路那拉特卡倫前進自係發報在前昨據常清奏到將圖庫爾所帶之兵一千餘名調回伊城已照該將軍所請行卽著檄飭官軍扼要嚴防妥爲布置一面懷遵疊次寄諭籌撥兵勇調赴各城迅速就援將回逆趕緊殄除以次肅清疆圉常清請調兵二萬名出關剿辦內地一有兵力可以騰出卽當揀派大枝勁旅

星速赴援會籌備蕩此時該將軍惟當就見存兵勇勉支危局以保邊疆若專待內地大軍一味株守坐視逆燄燎原恐常清不能當此重咎也俄兵五百餘名強占西北之夏博羅胡吉爾卡倫六月聞添兵六百名直入冬博羅胡吉爾卡倫聲言欲占圖爾根地方前據明緒奏已行文俄國准照議單分界除諭令總理各國事務衙門與該國使臣駁詰外仍著常清督飭派出官兵加意防範力籌堵禦毋得稍涉疏虞是爲主要將此由六百里諭令知之○戊寅諭議政王軍機大臣等喬松年奏麻羅之賊見竄英山並據報陳國瑞有謀叛情事一摺前據僧格林沁奏陳國瑞進兵遷延玩視軍務當以該員不知緩急降旨交部嚴加議處因材堪節取仍令該親王調令來營酌量調遣茲據喬松年奏稱接據英翰稟稱陳國瑞因奉僧格林沁札調赴營將所部隊伍交郭寶昌管帶

心生慚懼遂率眾謀叛圖襲商城勾結扶逆並據稱其黨止有譚
趙二姓及親隨隊伍等語覽奏曷勝詫異陳國瑞自歸僧格林沁
調遣以來戰勝攻取屢著勞績朝廷嘉其勇往擢任專閫待之不
爲不厚此次喬松年所奏各情是否因疑懼交乘遽生反側其譚
趙二姓及親隨隊伍人眾究有若干著僧格林沁喬松年查明具
奏僧格林沁仍遵前旨將陳國瑞所部隊伍交郭寶昌迅速接統
解其兵柄一面札令來營聽候查辦如情有可原不妨稍示優容
畱資驅策儻敢不遵調遣及真有謀叛實據則是驕盈昏悖自外
生成朝廷亦不能因其曾效微勞曲加姑息卽著僧格林沁相機
安籌辦理迅絕後忠麻城羅田之賊直竄英山喬松年已飭蔣凝
學嚴防六安並派張景春張德勝會同防守卽著督飭派出各軍
實力扼勦遇賊卽擊毋令匪蹤東竄但兵力尙嫌單薄著曾國藩

仍遵前旨調派得力將弁帶兵從英山一路前進以厚兵力諒該大臣成竹在胸必能權衡緩急妥速籌辦也將此由六百里各密諭知之○嚴諭駱秉章迅解甘肅軍餉○己卯諭議政王軍機大臣等馮子材魁玉奏鎮防頭起凱撤兵勇派員統率回營回籍一摺據稱鎮防定復奇勁雄宣制七營並果凱勝等勇共計凱撤四千餘名作爲頭起派委員營將領管帶給發川貴起程不准攜帶兵仗逗留滋擾並知會地方官彈壓其三江本省應募勇丁分別交地方官管遞回籍著明江南北軍營地方約束各等語辦理甚爲妥協卽著馮子材等飭令派出各員知照沿途各該地方官一體認真彈壓毋令生事其未經遣撤兵勇見經馮子材等查明精壯可用者存記應否挑補綠營兵額之處著曾國藩李鴻章會商馮子材等妥辦鎮防雖屬妥穩惟該處兵勇業已裁撤以後防務

李鴻章當委籌兼顧不可稍涉大意鎮城留守各營後起凱撤事宜卽著馮子材等按照此次辦法妥爲遣撤前據御史陳廷經奏已革安徽道員黃元吉才尙可用該革員見在何處其人是否可用著曾國藩查明具奏將此由四百里召諭令知之○以江南防勦出力賞提督張文德等正一品封典○予江蘇陣亡參將張朝綱祭葬世職○辛巳李鴻章奏尹隆橋賊屢攻不下郭松林等會議以賊聚守一處無隙可乘須避實擊虛改由後路鈔入七月二十五日卽飭李長樂等派隊出哨聲言進攻八字橋以分賊勢密令各營乘夜繞大德橋渡河先奪扼橋賊屢次夜郭松林等均於大德橋親督于奇泮等疾趨渡河圍攻逆壘並分隊攻僞王相賊不能支相率開營跪降大德橋及沿山賊壘一律埽平劉士奇

所部遂移至南岸官塘城賊全股來爭此路郭松林等飛約各軍乘機攻城堵逆黃汝金率悍賊數萬由尹隆橋鑼擁而來郭松林督隊由官塘接仗淮揚水師及王平西礮船沿河助攻楊鼎勳等直擣中堅衝突入陣斃賊二三千人堵逆不支率眾回奔追至橫塘渡尹隆橋立破堅壘十餘座李長樂等亦乘勝攻取八字橋賊知湖城已破四安又不得去遂折而逃南突分兩路一從北岸一由河南向港口小溪口梅溪直趨安吉郭松林飛派李長樂等從城隍山略取湖州親率大隊由八字橋渡河追剿王永勝由港口追剿楊鼎勳由尹隆橋向小溪口追剿劉士奇由大德橋向梅溪追剿王永勝追至港口折斷浮橋適郭松林踵至南岸賊約萬餘悉逼山谷聚殲無遺劉士奇楊鼎勳追至小溪口及梅溪鎮四面圍殺伏屍二三十里僞列王等逆酋均死焚奪賊船千餘隻旗幟

器械馬匹無數生擒逸賊萬餘救出難民數千人餘賊尙匿梅溪山內擬飭各軍入山搜勦前調道員吳毓芬探知湖州已破恐賊由林成橋分竄西安當即親帶洋槍隊冒雨宵征並派羅義勝水勇擡小舟數隻隨行馳抵觀音橋用小舟渡過數十人賊驚拒戰吳輔仁等踰濠撲營吳毓蘭揮兵乘之賊大驚潰斬殺甚眾吳毓芬見要隘已得令吳毓蘭等循河南攻牛山橋賊營自帶陳占榜等由河北攻林成橋南賊營洋槍炸礮連環轟擊先攻破甲午橋二營繞至林成橋南賊亦棄營向西安狂走吳毓芬急追二十里見路南山中賊多如蟻盡向西奔沿路斬擒七八百名投降千餘人追至西安吳毓蘭設伏誘賊賊果涉水擁至伏兵起擊我軍隨後掩殺萬國本等衝入賊隊大呼降者不殺跪降千餘人陳占榜嚴陣進逼余嘉龍等鼓噪乘之連破河南北賊壘五座一日夜間冒

兩轉戰八九十里計殲斃賊目數十擒斬千餘解散三千餘人劉
銘傳行抵建平後探知廣德踞城在城外築壘遂於建平布置糧
道先令周盛波等移紮白茅嶺水口自率劉盛藻等直抵城下賊
眾迎拒我軍槍礮齊發賊遽返奔追至西門適周盛傳亦派隊助
剿並抵北門城賊遂由南門出走我軍分路兜殺擒斬數百名餘
匪向南國安吉山中竄去當將廣德州城克復劉銘傳派周盛波
等入城駐守臣查湖州踞逆恃有西面竄路負嵎不下自浙軍分
攻安吉臣軍橫截尹隆橋等處要隘並進廣德以扼其吭堵逆見
咽喉將斷果欲背城一戰既不能西乃折而南圖竄安吉幸名軍
猛進沿途敗賊大股受創從萬山叢雜中逸出無多糧藥輜重拋
棄殆盡前路徽浙交界各有截勦之軍當不難於撲滅矣 上諭
議政王軍機大臣等湖州之賊擁眾竄入廣德廣德之賊未受大

創遠由南路出竄其人數必尙不少摺內所稱敗賊大股受創從萬山叢雜中逸出無多糧藥輜重拋棄殆盡前路徽浙交界各有截勦之軍當不難以次撲滅等語此乃懸擬之詞不可恃以無恐南國一路防軍甚單且堵逆黃汝金及幼逆洪幅瑱均未伏法必將竄擾徽甯號召羣逆或與江西匪黨聯絡勾結均屬不了之局著曾國藩左宗棠嚴檄甯國徽州守將慎重防勦儻兵力單薄即各添撥勁兵助勦並探明賊蹤已竄何處迅速具奏李鴻章素能不分畛域著卽飛調得勝兵勇出境追勦以竟此一責之功黃逆洪幼逆下落並著查明具奏鎮江防軍已據馮子材等奏請陸續裁撤李鴻章見派道員張樹聲統領六營駐守鎮江著卽飭令該道妥爲彈壓巡防與劉銘傳等廣德東境各軍聯絡聲勢務使閬閩安堵壓市無驚方爲妥善將此由六百里各諭令知之○諭都

興阿奏官兵克寶豐後移營進剿兵力不敷請飭曾國藩挑選馬步精壯十數營揀派得力統將數員赴甘飭富明阿令副將胡世英等帶英字選鋒兩營剋日赴甘並請飭穆圖善統帶馬步兵勇來營一摺都興阿一軍自克寶豐後進紫平羅縣城附近渠口堡一帶相機攻勦惟因進攻兵力不敷分布寶豐平羅一帶地勢極寬馬步各軍分投雕勦刻下情形進退維谷雷正綰等軍會勦張家川一時未能北來而河狄一帶賊氣尤熾中衛防兵單薄竄越堪虞在在須增兵防守自屬實在情形前曾諭令都興阿如兵力單薄著明曾國藩等酌撥並已令楊岳斌酌帶勁旅赴陝甘總督新任江西軍務未竣楊岳斌恐不能迅速到任著曾國藩於各路防兵內挑選馬兵精壯十數營揀派得力將弁數員統帶赴甘交都興阿調遣如金陵兵力仍可分撥卽酌撥數營由宿松斜趨麻

城與楚豫各軍會剿髮擒各逆尤可迅收夾擊之效並著曾國藩
妥籌兼顧揚防見在無事著富明阿卽派胡世英李曜堂將所帶
英字選鋒兩營剋日拔隊取道赴都興阿軍營此二營係都興阿
舊部自可十分得力本月初二日已有旨令穆圖善統帶所部馬
步各營馳往甘省會同都興阿雷正綰妥籌勦辦著穆圖善懷遵
前旨星速帶兵前往會剿不得稍事觀望是日並諭駱秉章於川
省得力兵勇挑選數千籌備軍裝口糧揀派知兵大員統帶赴都
興阿軍營聽候調遣著都興阿酌度情形分別咨催仍就見有兵
力妥慎勦辦如雷正綰一單先行得手亦可酌量分撥該將軍老
於行陣自然成算在胸不爲遙制另片奏中衛防勦情形請將鄧
鳳林革職各等語中衛地當衝要恐該逆乘筏偷渡防不勝防著
卽責令王贊襄會同地方官督率練團妥爲防勦不可稍有疏虞

候補參將鄧鳳林經都興阿派令隨同伊昌阿帶兵駐紮渡口以
通糧路乃該官兵散漫不整沿途逗遛實屬玩誤已極鄧鳳林著
卽行革職不准畱營以示懲儆河東五堆子渡口防兵卽令參將
春福等管帶駐紮彈壓以專責成烏什幫辦大臣伊昌阿卽著迅
赴本任毋任遷延將此由六百里各諭令知之○諭李雲麟奏川
髮兩逆圖竄西鄉見籌進剿並楚軍欠餉實數各摺片蔡啟兩逆
由洋縣以下之鍋灘金水西河等處意圖搭蓋浮橋渡河經官軍
擊退賊見勢難偷渡卽沿江西竄圖超襄河該逆抵襄河後如折
而東竄由西鄉出紫陽輒坪從此南趨夔萬以入川東竄房竹以
擾楚均有防不勝防之勢亟應嚴密堵禦以遏狂氛著官文吳昌
壽駱秉章各就本境檄飭將弁實力嚴防毋令匪蹤闖入李雲麟
卽飭派出之遊擊姜維揚一軍趕緊馳赴西鄉迎頭截擊並著該

京卿剋日親赴前敵相機調度迅埽賊氛李雲麟務將此股逆匪就地殄除若有名無實一味紙上空談縱令該逆紛竄川鄂又成不了之局該京卿自問當得何罪著劉蓉妥籌兼顧抽撥勁旅前赴西鄉一帶會籌埽蕩楚軍忍飢苦戰餉項奇絀前據官文奏楚軍五六兩月餉銀陸續籌解見在該營需餉甚亟若不速籌接濟譁潰即在目前著官文吳昌壽將應解五六兩月餉銀如數籌撥星速解赴李雲麟軍營以濟眉急劉蓉身任陝撫責無旁貸亦著迅籌餉需源源接濟用資騰飽而策成功將此由六百里各諭令知之○諭張凱嵩奏派軍分徇思恩南甯兩府暨武緣猺匪倡亂督軍撲滅查明歸順順州城被匪闖入官紳奮力勦除各摺片粵西官軍殄滅貴縣餘匪潯郡已就肅清惟左右兩江地方尚有伏莽未淨思恩之宋扶桿南甯之孫芒廣均係著名悍逆亟應乘勝埽

除以靖邊圍張凱嵩見派遣員易元泰統領參將潘忠實等營由賓州遷江一帶沿途搜勦以達思恩總兵李士恩統領水陸各營由橫永進規南甯所籌均尙周妥卽著張凱嵩督飭易元泰等軍相度機宜穩慎進剿務將宋扶桿孫芒廣等巨逆實力殲除其被脅團眾及民在求撫賊渠惟當體察情形妥爲解散設法安置總期勦撫兼施迅速嚴事如宋孫二逆就殲思南各屬戡定卽飭易元泰等督軍分路進規泗城太平等府埽蕩餘逆肅清全境均著張凱嵩隨時籌度辦理並檄催道員王承澤迅將寶慶所募新兵挑足成隊卽行赴營協勦劉坤一回省後因病請假卽著飭令迅速調理一俟就痊仍卽出省擇要扼繁相機督辦武緣縣屬之安定土司突有猺匪蒙李旺等脅眾煽亂知府沈康保飭地方文武及土巡檢潘梧等督團勦辦而月之間將逆首蒙李旺斬除該匪

全股撲滅辦理尙爲妥速在事官紳勇練及捐助經費人等准由
張凱嵩稟案擇尤請獎母許冒濫仍檄飭該地方文武激勵團勇
協同易元泰官軍進剿思恩境內踞逆歸順州城於本年正月閒
因賓州游民楊三等與廣東客團挾嫌滋鬧該州已革團總鍾啟
藩勾結匪黨突撲州城兼理知州瑞齡等督兵抵禦均受重傷致
匪徒乘閒闖入均屬咎無可辭惟於城陷後尙能乘機應變密檄
各鄉團練會同署知府興福所謂各團將賓州悍逆悉數殲滅並
擒斬關匪鍾啟藩等州城內外肅清尙屬深知愧奮至援黔之楊
廷桂一軍與全祖凱所部攻剿水潘十六寨土匪連日屢有斬擒
並焚毀賊寨多處旋因匪首李七分股由雞場出竄圖擾獨山州
城楊廷桂分軍赴援會合黔軍堵剿獲勝餘匪奔往都匀八寨見
在獨山附近尙有苗教各匪著勞崇光張亮基督飭全祖凱駐紮

獨山之軍會同楊廷桂所部剋期進攻務當乘此賊勢漸蹙之時
迅將李七股匪全數撲滅匪黨陳輝夏因與李逆不睦思欲投誠
自贖楊廷桂遴派勇民等入寨偵探相機解散著張凱嵩飭該副
將知會黔軍酌量妥辦不可稍涉大意將此由六百里各諭令知
之○命沈桂芬迅籌銀二三十萬兩解都興阿軍營○以浙江勦
匪功賞郭松林雲騎尉世職楊鼎勳周盛波黃馬褂予陣亡遊擊
杭進先祭葬世職○壬午諭議政王軍機大臣等官文奏髮捻被
勦分竄豫皖派兵追擊一摺髮捻各匪自官軍擊敗後人數尙多
分股亂竄斬水羅田等處之賊悉數東趨擾及六安英山一帶麻
城西路分竄料棚之賊經文武鄉團連次擊退河口防師李成謀
率隊截擊僧格林沁之軍亦至與楚軍會合跟追敗賊悉數遁入
光山縣境是楚北雖無賊蹤而豫皖均形喫重前因官文奏匪股

趙豫入皖紛竄不定諭令僧格林沁喬松年張之萬分投截擊見在皖豫兩省軍情並緊雖係敗殘之賊而匪勢尙眾亟宜迅圖聚殲方免蔓延之患昨據喬松年奏已飭蔣凝學嚴防六安並派張景春張德勝協同防守此時賊竄英山著喬松年迅飭蔣凝學等整隊前進迎頭截擊儻兵力不敷卽著飛咨曾國藩派兵合剿務期厚集兵力一鼓殲滅毋稍大意僧格林沁會有誘賊出險即可縱擊之奏此時賊入皖境地漸寬平馬隊正可施展而黃安敗捻復竄光山僧格林沁之軍未免爲所牽掣該親王務卽督飭色爾固善等先將捻股勦盡卽可移師而東兜擊髮逆將楚皖豫三省交界之賊次第殄除毋畱餘孽張之萬身任封圻責無旁貸見在逆匪闖入光山若任令竄越擾及完善更成不了之局著懔遵疊次諭旨飭令在防各將士振刷精神實力遏擊迅埽賊氛官文雖

已擊賊出境仍當督飭東西兩路各將弁分投追勦與皖豫各軍
聲勢聯絡以收夾擊之效毋得以賊蹤漸遠稍形鬆勁將此由六
百里各諭令知之○諭文祥奏南北兩路軍務緊急想請發兵撥
餉一摺新疆自回匪倡亂以來庫車喀喇沙爾吐魯番以至烏魯
木齊古城奇台木壘河一帶亂者四應日益蔓延幾有不可收拾
之勢巴里坤地方緊要雖經榮慶何琯等多方撫綏文祥復措借
銀兩解往接濟杯水車薪難裨實用且哈密城小兵單糧餉匱乏
亦難兼顧巴里坤著文祥就見有兵力妥籌策應扎薩克郡王伯
錫爾開渠籌餉懋著忠勤業已降旨加銜示獎卽著文祥傳旨令
其安撫回眾認真防範毋令煽惑滋事以顧大局古城漢城失後
保恆當激勵將士迅速攻剿毋令賊匪得以久踞吐魯番及巴里
坤等處防勦事宜並著文祥保恆咨令榮慶何琯色普詩新等妥

籌辦理平瑞帶兵在紅山待接仗後有無續獲勝仗能否迅解城
圍該都統總管懷遵前旨力籌守禦不可稍有畏葸明緒督飭榮
全帶兵赴伊塔城距伊犁不遠日來計已到任常清務當與明緒
將各城守禦及如何策應之處統籌熟計相機調派前次所調之
喀爾喀蒙古官兵著麟興車林敦多布廣鳳奎昌等迅卽調派數
千飭令前赴古城交平瑞等帶領進剿以厚兵力古城東接巴里
坤西鄰烏魯木齊如有兵犯紮則南路賊氛自可漸戢想該將軍
大臣等必能斟酌機宜權衡緩急也新疆回氛不靖必須命將出
師大張撻伐前已屢次寄諭楊岳斌令其酌帶所部勁旅馳赴陝
甘替出都興阿帶兵出關剿賊見在江西賊勢已挫腹地漸清而
關外賊竊日張早一日援救卽早解一日倒懸楊岳斌接奉此旨
卽著酌帶勁兵數千剋日起程赴甘該督到任後甘省軍務事有

專責都興阿大軍即可出關辦賊迅就蕩平從前回疆用兵每得力於川甘兩省之兵前曾諭令駱秉章派兵赴甘此時西路軍情日緊駱秉章當懷遵前旨於川省得力兵勇挑選數千籌備軍裝口糧揀派知兵大員統帶前赴都興阿軍營聽候調遣毋稍延緩李季高已簡放甯夏鎮總兵並著催令迅赴新任以資得力前因鹽固收復安置難回事體重大特派張集晉馳赴甘省妥爲查辦見在都興阿雷正綰各軍屢獲大勝乘甘回震懾之餘將陝西投誠難回善爲安置亦足令反側自安不至固結不解張集晉務卽剋日起程星馳赴甘相機籌辦並著將起程日期具奏將此由六百里諭知常清明緒平瑞文祥保恆麟興東林敦多布廣鳳奎昌楊岳斌駱秉章並傳諭張集晉知之○癸未諭議政王軍機大臣等喬松年奏髮逆大股竄至英山接仗防守情形並擬將何紹彩

防兵移向霍山各摺片髮逆糾眾數萬屯圍英山縣城經蔣凝學
統率所部官軍馳往進剿力戰數時之久賊匪敗竄追殺至南路
山岡斃匪甚眾勦辦尙爲得力惟捻逆散漫東竄勢將接踵而來
六安舒城一帶均須實力嚴防該撫已添派都司羅元超等帶勇
數百交張得勝統帶駐守六安並調陳飛熊往守舒城布置甚爲
周妥著卽飭令張得勝等嚴密防守毋稍疏懈蔣凝學一軍兵力
過單髮逆敗退之後復勾結大股圍攻英山縣城見仍悉力拒守
儻髮逆合竄皖境一半幸掣英山一半徑犯霍山以斷英山後路
則蒲凝學一軍勢成孤立喬松年見已函商會國藩擬將巢縣防
兵何紹彩一軍移向霍山卽著會國藩迅飭何紹彩統帶防兵進
禁霍山與蔣凝學之軍前後夾擊一鼓殲除甘肅涼州鎮總兵馮
標前在該大臣軍營此時甘省軍務緊急卽著迅飭赴任毋得任

令延緩昨據官文奏白果之賊經官軍擊敗悉數東竄英六一帶
當經諭令僧格林沁官文喬松年等分投截勦茲據喬松年奏稱
該匪由松子關一帶圖竄六安是六安防勦更形喫緊喬松年擬
調英翰一軍回皖協勦惟據該撫奏稱據英翰稟報陳國瑞部下
將士不肯同叛均投歸英翰營中陳國瑞自帶親隊千餘人仍在
麻城之三河口駐紮必須陳國瑞之事辦理就緒英翰之軍方能
調赴皖境著僧格林沁仍遵前旨將陳國瑞所部交郭寶昌接統
迅調陳國瑞來營相機查辦陳國瑞到營後卽飭英翰馳往六安
與在防各軍迎頭截勦並著督飭色爾固善速卽勦除捻逆移師
東擊並著官文督飭各路將弁追賊出境會合英六等處防兵兩
面兜擊盡殲醜類將此由六百里各諭令知之○左宗棠奏據薄
益澧稟稱七月二十六日接總兵劉樹元攻克昇山之報知賊竄

必速卽飭高連陞督同蔡元吉等進駐湖郡妙喜鎮分飭楊政謨等水師進攻長超山袁家匯賊壘該逆警見湖城火光紛紛棄壘狂竄時劉樹元各營已進入里店蘇軍道員潘鼎新亦率所部會剿敗賊紛向湖城逃竄未及進城賊已急啟西門而遁劉樹元潘鼎新當先衝殺入城蔣益澧督軍將竄賊橫截斬馘無數劉清亮等分門而入當於二十七日將湖州府城克復其由西門出竄之賊高連陞斬馘二千有奇二十八日蔣益澧復率謝茂勝等向梅溪一路追剿逆賊連夜乘船而逸經蘇軍及總兵羅大春所部截殺拔出難民不少僞璣王黃紹忠等率眾百餘名詣羅大春軍前乞降訊據賊供堵逆黃汝金由梅溪徑趨廣德祐逆李逸繼由安吉以出孝豐另分一股由四安竄勝德蔣益澧萬飭蔡元吉等駐梅溪自率高連陞等向四安追剿比抵四女竄賊已經蘇軍道員

吳毓芬等截殺殲斃甚多堵逆黃汶金於二十九日竄至廣德縣
挾洪幼逆由甯國縣祁門逃竄此次各逆拌死突竄經蘇浙兩軍猛
追擋截殺賊不下萬餘溺斃及自相踐踏死者不可勝數其逃散
之賊見官軍至輒跪伏道旁泣求免死約計陸續逃散者不下數
萬俱已遣令歸籍見在蕩益澧已分飭劉清亮等赴分水孝豐截
擊其楊昌濬進規安吉一軍於七月二十四日會同總兵周廷瑞
各營分路進攻拔椿毀柵槍礮轟擊城城大震二十八日夜急向
孝豐逃逸適湖州大股紛紛竄至楊昌濬飭朱明亮等出安吉南
路會同周廷瑞協力兜剿各軍追至殺賊無算收降七八千人楊
昌濬馳至孝豐適逆賊二萬餘正撲縣城楊昌濬督隊奮擊知府
劉璇等從城內殺出賊卽退竄官軍乘勢蹙之陣斃僞駙馬烈王

徐朗等賊目數十名斬馘千餘級赴水死者數千名解散尤多餘賊向山谷狂奔已過河者悉向甯國縣千秋關竄走三十日楊昌清復率劉璈等追殺至章村地方該逆憑河死拒官軍槍礮齊施駁不能支翻越而遁官軍追至甯國縣屬七都余村等處突遇龍旗悍賊千餘騎乘勢掩殺斃賊多名生擒二千餘名拔出難民五六千名八月初一日劉璈復派遊擊唐湘遠追擊又殺尾賊數百名收降千餘解散數千據逃出賊供三江兩湖被脅之眾俱已逃散淨盡祐逆李遠繼僅帶數十人撲往廣德與黃汶金合併臣查此次賊由湖州安吉出竄形勢已極渙散各軍四面兜剿殺斃溺斃及逃散就撫者約計不下十數萬人僞匡王賴汶鴻亦經官軍殺斃其餘各賊目或死或逃者甚多各營所收降賊俱已分別資遣該逆由孝豐竄出歸併廣德復與踞逆黃汶英及洪幼逆等分

路上竄勢必假道徽池以擾江西而爲入粵之計臣已飛咨皖南
江西各處防軍並嚴飭高連陞等跋蹤緊追飭黃少春一軍從嚴
州繞赴前途王德榜王開琳兩軍併赴婺源浮梁一帶相機截擊
無論竄皖竄江總當盡力截勦將此股悉數殲除 上諭左宗棠
奏克復湖州安吉兩城並追勦竄賊大獲勝仗及督飭官軍搜捕
划船土匪各摺片勦辦甚爲出力所有在事文武數月以來屢次
苦戰尙屬著有勞績著俟此股竄賊剿除卽由左宗棠分別保獎
候旨施恩湖州安吉已克浙境肅清惟堵逆黃汝金挾幼逆洪幅
墳由昌化績溪一路逃竄值逆黃汝英與忠逆之子向涇縣祁門
一路竄去漏網餘氛分路上竄必將假道徽池以擾江西而爲入
粵之計若不迅速兜勦深恐匪黨聯絡勾結其勢復張左宗棠已
飭提督高連陞等躡蹤緊追並飭黃少春王德榜等軍從徵嚴

帶繞出賊前相機截擊卽著嚴飭官軍盡力截勦毋論竄江竄皖總期悉數殲除李鴻章恪遵前旨飛調得勝兵勇會合浙師出境追勦竟此一簣之功楊岳斌沈葆楨督飭饒景等處在防將士實力扼堵毋令一賊入境庶不至與前股竄匪聯成一氣又成不了之局江右敗賊竄至贛甯南贛防務喫緊此次湖州等處竄賊又有由江入粵之意毛鴻賓郭嵩燾務當邊疊次諭旨先事圖維派兵出境防堵張運蘭已取道嘉應赴閩卽著徐宗幹准令迅速前進擇要駐紮以固閩省邊防皖南防兵單薄曾國藩當迅檄墜師前往助勦毋稍疏虞湖州蘇州土匪乘坐小划肆行劫掠人數多至數萬划船多至數千恃其港汊紛歧船檣利便導賊抗軍習爲故智竇蘇浙兩省心腹之憂著左宗棠督飭水陸各軍及地方守令乘此兵威密速妥辦盡絕根株毋畱後患左宗棠徐宗幹奏臺灣

灣文武藉詞諉過派委胡肇智前往查辦一摺此案前因丁曰健奏稱林文察頗兵逗遛並其叔林天河依勢作威等語曾經諭令左宗棠等查參茲覽左宗棠所奏林文察以餘匪復熾諉過於地方官是該處文武意見不合互相攻訐殊屬不成事體著左宗棠徐宗幹督飭胡肇智將實在情形確切查明分別嚴參懲辦以肅官常另片奏林文察等日久尙未赴調等語已明降諭旨將該總兵交部議處矣仍著左宗棠飭調該總兵等迅速內渡毋再延緩喬松年奏皖省軍務日緊軍餉已竭請將江蘇停撥月餉照舊撥解等語著李鴻章將江海關每月舊撥皖餉二萬兩仍飭該司道照舊按月協撥解赴喬松年軍營毋稍延誤將此由六百里各諭令知之○諭雷正綰奏攻毀張家川逆巢見移營進攻龍山鎮賊壘及河州戒嚴請飭曹克忠迅赴本任各摺片張家川逆匪踞險

抗拒官軍經雷正綰與陶茂林合軍攻剿破其巢穴餘賊向龍山
鎮敗竄雷正綰已與陶茂林各派隊伍拔營跟蹤進剿卽著該提
督等將龍山鎮蓮花城迅圖攻拔盡洗逆氛都興阿之軍進規甯
靈前經派兵渡河將寶豐攻克軍聲不振賊膽已寒惟甯靈一帶
回蹤廣集仍應厚集兵力方能迅就蕩平雷正綰擬俟龍山鎮等
處克復親督各營直趨隆靜就近察看固原情形順道北向興都
興阿之兵會辦甯靈卽著會商都興阿妥籌夾擊固原回匪雖稱
乞撫前據恩麟奏報該處回眾北竄甯靈中衛等處喫重是乞撫
之說尙難深信雷正綰務當詳察眞偽相機辦理不可大意中衛
地當緊要梁生嶽等軍本不足恃雷正綰擬令陶茂林於攻克龍
山鎮蓮花城後率所部馳赴中衛蘭州一帶扼要防勦所籌深合
機宜著卽飭令陶茂林將該兩處賊巢迅卽攻克率師前進以資

得力前次恩麟奏稱趙必達統帶果義一軍勦辦河州回匪連賊皆捷而此次雷正綰則稱河州紳民稟訴趙必達防練疏忽恆怯無能是該員之不能得力已可概見恩麟乃以此等劣員統兵勦賊已屬用人不善又不將該員據實參奏猶且粉飾多詞鋪張入告該護督是何居心甘省徧地賊氛恩麟貽誤不少不知力圖補救稍盡心力尙如此昏憒糊塗任令地方糜爛自問當得何罪著雷正綰卽將趙必達劣款查明如果防練疏忽恆怯無能務卽嚴參懲辦一面派委知兵大員前往接統其眾至河州鎮係曹克忠本任該處情形喫緊陝西賊勢已鬆無須該員在候助勦著劉蓉卽飭曹克忠統帶所部原營迅赴河州本任不准遲延並不准劉蓉再行奏畱致誤事機陝省近日軍情仍著劉蓉隨時馳奏曹克忠抵河州後如尙須添兵助勦著雷正綰會商都興阿酌量派撥

數營以資攻勦將此由六百里諭知都興阿雷正綰劉蓉並傳諭恩麟知之○諭麟興等奏遵調喀爾喀蒙古官兵馳往古城助勦並撥給科城腰刀火藥廣鳳等奏蒙兵向無軍器糧餉盡匱諸多掣肘情形暨屯防兵丁無可分撥等摺片古城待援甚急烏魯木齊賊氛更熾經麟興等於西兩部落蒙古官兵及各旗防邊蒙古官兵內前後調撥一千名並飛咨文盛調蒙兵一二千名廣鳳等已揀選蒙兵一千名前往古城應援卽著催集各軍星馳進發趕抵古城以備各城調遣所有該官兵口分仍著保恆平瑞設法籌備若因遠道而來枵腹荷戈非但征勦不能得力兼恐有譁瀆之虞其烏城迤北一帶西接科布多路通古城恐該處回匪奔竄靡定人心惶惑著麟興等飛飭該盟長等傳集各旗蒙古官兵扼守要隘遏賊東竄之路科城軍器不敷麟興等開庫儲腰刀火藥等

件撥赴科布多應用卽著飭令蒙古臺站弁兵按站護送以期妥
速科布多調撥之兵雖經廣鳳等飛飭杜爾伯特等選兵備調而
該蒙古等向不應私置軍械且均未經出征科城糧餉支絀器械
餉糈均難籌畫古城以西各城回氛肆起萬難坐視不救但調兵
卽須得一兵之用若以烏合之眾湊集成軍器械又不得手到防
後不能禦賊徒耗餉糈於事何濟著廣鳳等慎加遴選擇其精壯
可用者酌量派往以期得力正不必拘定數目反致有名無實科
布多屯防兵丁無多旣屬不敷分撥卽著畱於本城毋庸勉強調
派將此由六百里各諭令知之○諭廣鳳奎昌奏查勘科爾沁海
畱圖等處居住內服之哈薩克作何安置應由塔城辦理並豫籌
科屬蒙古情形仍須照舊遊牧各摺據稱接准分界大臣咨稱令
查科爾沁海畱圖一帶居住交納租馬內服之哈薩克人眾作何

安置查此項人眾雖居科境不屬科城管轄遇有事件向係由哈薩克汗綽坦公阿濟呈報塔爾巴哈台參贊大臣覈辦其每年交納租馬亦係由塔城派員解交科城科布多並無此項冊檔無憑查其確數等語此項人眾既據廣鳳等奏明係屬塔城所管卽著明誼會同錫霖等按照廣鳳等此項咨送哈薩克居住地名清單酌覈辦理並據廣鳳等查明烏梁海邊境除瑪呢圖噶爾勒幹卡倫一帶科爾沁海畱圖及霍呢邁拉扈等處有哈薩克居住外別無空閒地方將來分界後如須為遷應由塔爾巴哈台參贊大臣酌地安置明誼尤當與錫霖等商籌安輯之方免致失所至科城所屬蒙古人眾見經廣鳳等體察情形未便遷入卡內萬不得已僅可在北入臺等處暫為安置而臨時有無掣肘日久能否相安均難豫定並據杜爾伯特烏梁海等處蒙古呈報游牧處所無可

讓出總以照舊游牧方爲妥善各等情見在西路分界業據明緒
等給與俄國照會准照議單分界是該處地方恐不免爲俄國包
去應如何妥籌辦理俾該蒙古等得安生業之處著明誼相度情
形知照廣鳳等妥爲商辦將此由五百里各諭令知之○予安徽
陣亡副將王福齊等祭葬世職○撥山西道庫銀三萬兩解科布
多城○甲申僧格林沁奏查髮捻各股經我軍疊次擊敗悉數奔
竄麻城以南閔家集白泉一帶成保等先後移營前進旋據成保
報稱七月二十二日商令英翰各軍進攻閔家河迤西沿山賊壘
成保等各帶本隊由北分路攻勦閔家集一帶踞匪同時並進周
登高等先登破壘隨入閔家集來往衝壓集南賊壘齊出接應經
成保等由東面併力衝擊立將賊匪擊敗全數向南鼠竄共攻破
賊壘二十餘座賊村五十餘處捻首張總愚等竄入西山又總兵

郭寶昌帶領所部抵麻城東南繁營探剿蔡家畈閔家集一帶扶逆老巢帶領全隊衝枚疾馳行至長埫一齊翻越攀登逆眾慌亂欲竄我軍礮火齊施乘勢撲入該逆率眾力拒各路援賊畢至郭寶昌卽同英翰各督隊伍直上施放槍礮斃賊數百名賊勢漸退我軍乘勝追剿敗賊羣向白果奔去當將蔡家畈等處老巢克復二十三日探得扶逆等股向東遁竄遵逆張總愚等股見向麻城西北打館白果一帶已無賊蹤我軍分路跟剿二十九日追至光山縣廸南之晏家河遂見賊壘林立馬隊分兩路前進步隊亦到衝壓數次因天晚路狹收隊八月初一初二等日追至雞籠山逆東逆股均依山盤踞我軍因稻田泥淖坑坎甚多無處列陣均靠山順河撤退當飭成保等督隊馳赴羅山縣南駐紮扼賊西北竄路先是探得晏逆遁西擒逆張總愚等經官軍屢次擊敗合夥西

趨意圖回竄豫陝臣遂選帶病瘡馬隊千名由長嶺集兼程前進
八月初一日馳抵羅山該逆在羅境楊家店一帶盤踞當卽取道
九里關繞賊西面相機截勦因統帶馬隊之護軍恆齡在途病瘡
當委侍衛托倫布暫爲統帶令翼長全順前後照料臣於初三日
督令翼長舒通額等管帶馬隊向楊家店進勦該逆往東潰退我
軍緊躡其後追殺三十餘里至萬家店逆眾列仗回拒我軍衝壓
匪勢不支向蕭家河老巢敗竄我軍仍復跟追賊卽拚命抵抗我
軍奮力鏖戰該逆抵死不退大股賊匪繼至援軍爲敵所阻不能
接應前路馬隊因稻隴狹窄馬力難施步賊左右包鈔舒通額等
俱下馬力敵短刃相接左右轉戰殺賊無數該逆愈聚愈眾我軍
陷於深溝之中以致失利正黃旗漢軍都統翼長舒通額頭等侍
衛隆春奇克塔善副都統護軍參領祥恩營總常德西蒙額頭品

頂戴協理台吉克興額頭品頂戴副管旗章京布彥吉勒噶勒二品頂戴副管旗章京那遜巴雅爾副管旗章京霍呢齊二品台吉副管旗章京海勒普沁保二品台吉三音阿木固明布彥克什克等俱手刃數賊力竭陣亡實屬異常忠勇因思舒通額等俱係從征多年轉戰數省削平捻苗各逆與幅敎各匪每遇大敵無不以一當百爭先力戰得以所向有功相應請旨將舒通額等交部從優議卹以慰忠魂其餘陣亡官兵弁兵丁容俟查明具奏見在成保管帶各隊於初六日業已抵羅卽飭移紮羅邑以南扼賊西北竄路竊查此次失利實因山道崎嶇稻隴狹隘兼之路徑生疏所致帶隊之員傷亡較多馬匹亦多陣斃其全順托倫布諾林不勒殺出重圍傷亡兵丁尚不甚多約計不過二百餘名稍加整頓誓必滅此朝食是役若有步隊數千一戰可期歲事以前路地勢而論

若專賴馬隊實難得手見擬就近招募本地勇丁千餘名用作嚮導以利進剿再據張曜報稱已革荆子關副將徐連陞帶領所部在羅田縣膝家埠以北遇賊接仗殺賊甚多該副將身先士卒奮不顧身力竭陣亡又陳得才等股悉數折回意圖窺犯經張曜督隊接應該逆未敢撲營見在逆眾自金家寨至開順街橫踞九十里處處與商固交界惟有會合各軍以勦爲防復據英翰報稱連接張曜來信白泉之賊進山後未能東竄均已折回北來大股已至膝家埠距長嶺松子兩關相近張曜立卽督隊搶紮長嶺關營盤一齊即可開仗催令英翰至商城會剿各等語見在英翰已同郭寶昌全行拔隊繞赴商南擇要以進如賊北來卽迎頭截擊如賊東竄則跟蹤尾追八月初三日抵商城之鄧家集探得該匪在霍境葉家集一帶盤踞並分股在商境黃土嶺以南游弋擬卽偏

賊繁營與張曜等軍會合相機攻勦仍分撥兵勇督同民團把守黃土嶺要隘以期兼顧商城臣仍飛飭張曜英翰等効力同心認真堵勦毋任他竄致滋延蔓至已革副將徐連陞打仗陣亡殊堪憫惻相應請旨將已革副將徐連陞開復原官交部照例議卽上諭議政王軍機大臣等麻城以南踞賊經成保等軍在閔家集蔡家畈等處壘獲勝仗僧格林沁親督馬隊馳赴羅山堵勦西竄股匪追至蕭家河一帶因大股援賊繼至我軍馬力難施陷於深溝之中以致失利據該親王奏稱傷亡兵丁不過二百餘名稍加整頓即可進勦卽著僧格林沁整飭隊伍激勵將弁相度地宜實力進攻以期迅殲醜類該親王成算在胸雖偶有挫失自能運籌決勝以振軍威僧格林沁擬就近招募本地勇丁千餘名作爲嚮導該處地勢既須步隊方能得手卽著該親王酌量辦理該匪見

竄霍山葉家集一帶盤踞並分擾商城黃土嶺以南游弋英翰郭
寶昌等軍已抵商城之豐家集卽著僧格林沁檄令該臬司等倡
賊而營與張曜等軍會籌塲蕩迅殄逆氛僧格林沁大軍進擣羅
山逆匪非有步隊協勦不足以資取勝著官文速派成大吉李成
謀等步軍出境跟蹤追蹤並一面派撥步軍繞出羅山之前攔頭
截擊以收夾攻之效該逆見竄英霍一帶喬松年雖已調何紹彩
一軍與蔣灝學協同扼守如兵力尙嫌單薄著曾國藩酌調數營
前赴英霍助剿曾國藩見駐安慶即可就近權衡緩急情形妥爲
調度並著張之蔚就見有步隊檄赴光羅等處均歸僧格林沁調
遣以厚兵力喬松年仍遵本月十四十五等日兩次諭旨妥爲籌
防陳國瑞曾否到營見在情形若何著僧格林沁詳查具奏另片
奏請將張曜開復等語業經批示照准仍著該親王隨時策勵認

真追勦以期迅速立功將此由六百里各諭令知之○諭穆圖善奏遵旨馳援甘省將各營部署起程慶昀奏抽挑兵勇夾擊獲勝並聞有西回匪來投入夥各摺片穆圖善所統各營經該將軍飭各營官剴切曉諭均各深明大義志切同仇實屬奮勉著先行傳旨嘉獎仍著劉蓉查明各該營欠餉酌量給發如一時未能全給俟各處協餉到後陸續補解並著查明從前各營兵弁勇丁隨同多隆阿在陝打仗實在出力未經得有保獎者准穆圖善劉蓉擇尤彙案請獎不得稍有冒濫以昭平允穆圖善所請令金順兩起馬隊隨同赴甘卽照所請行此次追勦蔡啟各逆勞績亦准查明請獎穆圖善當隨時激勵諸軍勵以大義俾邊徼早就肅清同膺懲賞仍將兵勇實數及起程日期趕緊奏報以慰馳厯都興阿於此軍到後商酌調派以期得力蔡啟等逆向秦嶺一帶逃竄劉

啟仍駐盩鄂一帶務當督飭將弁儘力追勦楚豫各邊防守須慎
固封守不可大意仍將近日勦辦情形據實馳奏慶昀卽知照常
陞在納家牖一帶擇要屯紮牽制賊勢以通南堡運道一俟杜嘎
爾之軍到濟卽行會剿不可率行深入致有疏虞都興阿當飭杜
嘎爾等與常陞所帶兵勇聯絡聲勢以收夾擊之效城防一切事
宜仍著慶昀妥爲經理際此事機漸順尤不可稍涉大意墮賊詭
謀懷之愼之慶昀另片奏近日偵探平固敗賊入金積堡爲馬化
漋挑選收集次入納家牖王家園莊以及郡城等處已虜聚六七
千名並聞郡城中有西同兩府投來入夥之賊此等匪徒聚集多
人必圖大逞都興阿慶昀均須督飭帶兵各員認真防勦毋任肆
意勾合又滋蔓延慶昀欲於綏遠城勦捐馬匹解送甯夏著卽咨
催德勒克多爾濟迅卽籌辦可也將此由六百里各諭令知之○

予湖北陣亡都統舒通額副將徐連陞祭葬世職○丁亥諭議政
王軍機大臣等張之萬奏麻城敗賊被勦狂奔官軍沿途追截互
有勝負見籌添募勁旅相機兜勦一摺所奏情形與僧格林沁前
奏大略相同見在東竄之扶逆折回商城近境與張曜相持而西
竄逆氛麌集於楚豫之交賊勢甚熾僧格林沁見已移紮羅山扼
賊西向惟該處地勢崎嶇田塍交錯馬隊仍難著力僧格林沁派
楊長春招募秦軍散勇二千名張之萬飭宋慶添募步勇一千五
百名固爲因時制宜起見第賊計甚狡難保不一氣狂奔肆其衝
突況倉卒召募之勇訓練未精亦恐難以禦敵僧格林沁張之萬
總當就見有兵力熟籌堵勦毋令賊蹤西犯擾及完善之區仍一
面將存營步隊逐加選汰去弱畱強一面將募勇事宜迅速辦理
務期精壯可用以輔馬隊之不足毛昶熙所部步隊居多可否調

赴前敵以厚兵力之處並著酌量調派官文懷遵前旨速派成大
吉李成謀等步軍出境跟蹤追蹤並一面派撥步軍繞出羅山之
前攔頭截擊歸僧格林沁調遣以收夾擊之效不得畫疆自守貽
誤戎機自干咎戾將此由六百里各諭令知之○戊子諭內閣前
因戶部奏將軍需報銷變通辦理當經明降諭旨凡同治三年六
月以前各處軍務未經報銷之案准將收支總數開單存案免其
造冊報銷茲據該部奏請嚴飭各統兵大臣督撫認眞督辦另片
奏請將已經咨題題覆各案畧一辦理等語向來糧臺造報本易
矯誣此次開單更恐肆行冒濫儻封疆大吏不能破除情面認眞
刪減將使朝廷逾格隆施轉爲屬吏侵漁地步殊非國家實事求
是之心所有同治三年六月以前各處軍需用款准照新章奏報
者有統兵大臣責成統兵大臣辦理無統兵大臣省分責成各該

督撫辦理至江蘇徐州及江南江北糧臺向准管理糧臺之員徑行咨銷此次若仍由糧臺開單殊不足以昭覈實徐州糧臺著責成吳棠辦理江南江北糧臺著責成曾國藩吳棠辦理各省鉅萬軍需由該大臣督撫一言而定儻有不實不盡之處必惟該大臣督撫是問至開單存案事屬剏始其中款目繁多應如何分年分起覈實開報之處著該大臣督撫等各就實在情形先行妥議章程具奏如有吏胥人等在外藉端撞騙者著懔遵前奉諭旨嚴行查拏從重懲辦其同治三年七月初十日以前已經咨題到部尙未覈覆之案即由戶部查照收支總數暫行存案無庸題覆仍行文各該省自行覆加確覈遵照新章開單奏報毋許稍有含混至從前已經題覆各案內有指款駁查之件並著各該省詳細查明應削減者覈實刪減應聲明者據實聲明各歸各起奏報存案以

歸畫一而杜流弊○諭賈洪詔奏假期已滿病難速痊請開缺調
理一招賈洪詔自簡放雲南巡撫以來朝廷因該省軍務緊要疊
經諭令迅速前赴昭通妥爲辦理該撫以告病人員經朝廷特加
超擢簡任封圻宜如何激發天良遵旨前往實心任事乃自上年
三月閒簡放後該撫卽託調節節逗留遲至十月初抵四川省城
方冀其抵川後權衡緩急迅赴昭通悉心籌辦以副委任迄今又
將一載未離川省一步措置毫無覽其奏報均屬紙上空談並不
認真籌畫前以虛血益劇病體難支等詞入告給假兩箇月俾資
調理茲復據奏稱雲南軍務緊要未敢以病軀戀棧請開缺回籍
治理需人若奉旨簡放之員均似賈洪詔之託病不前工於趨避
尙復成何事體賈洪詔著卽革職以爲規避取巧者戒○己丑諭

內閣曾國藩奏從前保奏攻克各城水陸出力人員各案歷經吏部咨覆令將各員勞績分晰註考報部覈辦時因軍務倥偬未及按名分註見在事隔數年積至二十二案之多勢不能逐一補註懇請均免加考報部卽照原單一體註冊等語向來軍營保舉人員均應將何項勞績聲明報部覈辦此次據曾國藩奏稱所保各案均係首先陷陣戰功卓著者始保越級免補免選等項與部章本無不符況見已事隔多年積案不少若必令逐一補註考語再行覈准轉使積功將士官階懸而無薄殊不足以示激勵所有會國藩奏保各案人員均著照原單一體給予獎敘其有原保與例未符業經有旨更正者亦卽逆旨給獎毋庸加考報部覈議此係特旨允准得援以爲例○曾國藩奏臣欽奉諭旨飭查江甯城內居人能否漸次復業貢院有無損壞應如何修葺等因查

江甯省城居民流亡殆盡此次官軍克復羣酋縱火焚燒昔年巨室富家改造僞府鮮有存者此外民房極少故克復幾及兩月街市尚未復業至貢院臣當履勘至公堂衡鑒堂明遠樓未經毀壞號舍一萬六千餘間亦多完好惟號板全失監臨主考各房均須蓋造見派員在鄂皖等處採辦木料趕緊興修擬於十一月舉行鄉試庶因士子雲集商民亦可漸次來歸復欽奉諭旨江甯旗營事宜應妥籌辦理房屋早爲建蓋兵丁俸餉能否照例全支見在京旗生齒日繁如挑選間散陸續撥補江甯兵額能否有裨令臣覈議查駐防旗營亟宜修理惟一時大工畢舉籌款實難擬俟貢院工竣再修江甯旗營以次續修京口旗營工作有先後之分庶籌辦有措手之處昔賊陷江甯旗營三萬餘人幾無存者被害之慘甚於京口十餘年來陸續增添見存不過八百餘人籌餉尙易

爲力臣擬將江甯滿營概發全餉其京口旗兵業已挑補足額俸
餉較鉅請仍照見辦章程暫給半餉一俟庫藏漸裕續行奏明一
體全支至挑閒散京旗以實江甯兵額亦俟修蓋營房規模鑑定
會同富明阿續奏辦理又欽奉諭旨據御史陳廷經條陳善後事
宜內有疆輿略爲變通一條飭臣酌度形勢妥籌具奏臣查蘇皖
未分之時跨江淮而爲省古人經營疆理具有深意是以二百年
來未嘗輕議更張若必畫江而分南北兩省則亦宜畫淮而分南
北兩界淮北如蘇之徐州皖之潁州則割隸何省乎臣愚以爲疆
吏苟賢則雖跨江跨淮而無損於軍事吏事之興疆吏苟不賢則
雖畫江分淮而無補於軍事吏事之廢此等大政似不必輕改成
憲續又接奉諭旨垂詢楊岳斌赴任後鮑超謀勇素裕能否勝督
辦之任臣前因江西軍務雖已得手而侍逆未受大創趙重南贛

湖州等股又將續入江西咨商楊岳斌暫緩赴任茲楊岳斌奉旨
迅赴甘肅自必剋日啟程鮑超戰功最偉屢次收降巨股賊中服
其威信自足勝督辦之任惟目下江西軍務宜分兩路辦理鮑超
見駐撫建應責令專顧北路備勦湖州廣德續至之賊劉典等見
已併趨甯贛應責令專顧南路追勦侍濤等逆上竄之賊果能分
任責成撫臣和衷調度當不必另派督辦而江境亦可次第肅清
復欽奉諭旨飭令調派金陵將弁帶精兵萬人由英山一路前進
與楚師會合夾擊查前因皖南北邊境喫緊臣即在金陵抽調朱
南桂八營馳赴皖南進剿廣德劉連捷十營朱洪章三營渡過皖
北防勦英山調撥甫定不意羅田斬水之賊已撲犯英山營盤蔣
凝學雖疊獲勝仗而糧路梗塞可虞茲幸廣德已克臣飛催劉連
捷朱洪章朱南桂三軍悉赴皖北進趨英霍以收夾擊之效又奏

臣前欽奉諭旨已革臬司李元度罪重罰輕飭按照所參各情查
明具奏臣以此案業經奉旨交左宗棠查辦臣係原參之員例應
迴避因函商左宗棠詳查專奏今幸金陵克復大功鑑成臣兄弟
叨綱異數前後文武各員無不仰荷殊恩追思昔年患難與其之
人其存者惟李元度抱向隅之感其歿者尚有數人懷不瞑之恨
不得不略陳一二上干聖聽李元度從臣最久艱險備嘗其十
年守徽之役到郡不滿十日僞侍王大股猝至兵力未厚府城失
陷經臣奏參革職拏問其十一年援浙之役參案未結遽行回籍
沿途飾報勝仗又不力救杭州經臣奏參革職畱營議者皆謂臣
後參援浙最爲允當前參守徽失之太嚴而內省尙不甚疚所最
疚者當咸豐六年春臣部陸軍敗於樟樹鎮江西糜爛賴李元度
力戰撫州支持危局次年臣丁憂回籍畱彭玉麟李元度於江西

聽其飢困阽危蒙識忍辱幾若避棄而不顧者此一疚也李元度
下筆千言本有兼人之才外而司道內而清要均可勝任惟戰陣
非其所長咸豐五年自請帶勇十年夏閒臣又強之帶勇用違其
才致令身名俱裂皆臣不善器使之過此一疚也此二疚者臣累
年以來每飯不忘茲因忝竊高爵拜恩懷舊慚感交并此外如江
忠源之將才大可有爲於時長江水師雖創於臣而不知其議發
於江忠源咸豐三年江忠源在江西圍城中一面奏請設立江面
水師一面函致臣在湖南造船臣以無資未速造辦厥後江忠源
屢次催請救援臣以無船無兵不能應之逮劉長佑江忠潛馳援
廬州臣亦不能以一兵相助致廬州淪陷夏將不竟其用至今耿
耿此亦一疚也原任甯池太廣道何桂珍以翰林出爲道員甫至
店埠和春派三百人檄令馳援廬江未及到防卽以救援不力奏

參革職其事本極委屈厥後播遷楚皖之交帶團勦賊飢餓艱危
歷人間未有之苦屢粟願隸臣部下一雪忠憤臣亦無以應其求

而遂其志卒爲人所戕天下冤之此又一疚也咸豐六年臣被困

江西與湖南音問不通者八閱月胡林翼奏派劉騰鴻普承堯吳

坤修與臣弟會國華帶勇六千馳援江西苦戰兩月師抵瑞州從

此兩湖始通文報江西始有轉機實惟劉騰鴻兵力最勁功績最

偉次年臣丁憂歸籍劉騰鴻與臣堅約欲臣迅速回營得所依倚

臣以陳情守制未還江西劉騰鴻因堅城不下餉項不繼諸事齷

齷盼望臣往爲之主持而不可得抑鬱無聊終日僵城苦攻中礮

而亡劉騰鴻以救臣而來臣反若委之而去不加護惜喪此烈士

此又一疚也楚軍之興驍勇以塔齊布爲最雲南之畢金科久之

二人皆能以匹馬入敵羣賊熟視而不敢逼六年二月樟樹鎮之

敗惟畢金科一隊得完臣旋派令救援饒州畢金科長跪臣前稟稱孤軍千人不足獨當一面願隨左右不願遠離臣許以不久調回慰而遣之後在饒州屢次血戰以事機不順未及保獎又爲同事所排擠憤鬱飲泣七年正月戰死於景德鎮饒人憐之臣一言失信墮此長城既不能善用以大顯其功名而雲南梗阻萬里又不能寄金以優恤其父母此亦一疚也李元度屢經臣參劾未便再由臣保薦應如何酌量錄用之處出自聖主鴻裁至江忠源何桂珍劉騰鴻畢金科可否由臣奏請加恩之處恭候訓示上諭議政王軍機大臣等會國藩奏接奉寄諭分條覆奏一摺覽奏均悉江南北見經蕩平急宜振興文教前次寄諭以貢院有無損壞爲問原欲於來歲特開一科以免士子日久向隅茲據奏親至貢院履勘至公堂等處及號舍均尚完好惟號板毀失監臨主考

房官等屋片瓦無存見已派員趕緊興修擬於九月奏請簡放考
官於十一月舉行鄉試等語著卽飭令委員認真經理如工料一
時不能畢集卽緩至來歲補行鄉試亦無不可仍著該大臣酌度
時勢再行奏請江甯旗營駐防見存不過八百餘人京口旗兵已
挑補足額該大臣擬將江甯滿營概發全餉京口旗營暫給半餉
俟庫藏漸裕再行一體全支均著照所議辦理旗營兵丁見無屋
宇棲止其情形倍極困苦著飭令辦理之員迅卽督工修理無稍
延緩至挑間散京旗補江甯兵額之不足俟營房稍有眉目卽與
富明阿商酌辦理陳廷經前奏變通疆輿一節朝廷卽恐輕議更
張未必實有裨益該大臣以爲吏事軍事之廢興全在疆臣之賢
否似不必輕改成憲可謂要言不煩陳廷經所奏應無庸議江西
軍事漸平惟侍郎等逆尙未誅鋤楊岳斌赴任後鮑超與劉典等

分辦南北兩路不必另派大員督辦沈葆楨有地方之責著與鮑超等隨時商榷和衷辦理以靖疆圉見在湖州廣德克復餘逆竄甯國等處山內會否續竄江西軍情旦夕不同會國藩仍當會同沈葆楨統籌兼顧卽飭令鮑超等分任南北兩路以專責成俾收廓清之效英山被圍糧路梗塞深爲可慮該大臣卽嚴催劉連捷等二十一營迅赴皖北如一時餉項未集卽先到十數營亦可期其得力著卽妥爲區畫務將英霍一帶竄匪剿除淨盡不得稍畱遺孽皖南北近日軍情並著隨時馳報以慰屢繫江忠源已屢次加恩於朝廷報功之典亦尙允當此次該大臣所請與何桂珍劉鵬鴻畢金科等三員應如何一併加恩之處卽著該大臣查明具奏再降諭旨密片一件畱中將此由六百里各諭令知之○諭前因有人奏已革臬司李元度罪重罰輕請仍按律定擬先後諭令

左宗棠曾國藩確切查明據寶具奏茲據曾國藩奏稱李元度從該大臣最久艱險備嘗咸豐十年守徽之役到郡不及十日侍逆大股猝至兵力未厚府城失陷奏參革職拏問本屬從嚴十一年援浙之役參案未結遽行回籍沿途飾報勝仗又不努力救杭奏參革職畱營尙爲允當且當六年春閒江西糜爛之時賴李元度力戰撫州支持危局該革員本有兼人之才惟戰陣非其所長用違其材遂致身名俱裂見在大功初成追思昔年患難與共之人惟李元度獨抱向隅之感懇請酌量錄用等語李元度一員前因有人奏參於同治元年閏八月閒寄諭左宗棠查奏此次曾國藩所奏各情仍著該督詳細查明李元度從前被參罪重罰輕之處是否允當迅速具奏至湖州安吉克復以後堵逆黃汶金挾幼逆洪幅墳由績溪一路竄去該督飭高連陞等追勦並令黃少春等

軍繞前截擊近日軍情若何此股敗匪向西奔竄必併趨江右以圖勾結著左宗棠嚴飭派出各軍前截後追將湖郡逸出之匪悉數就地殲除毋任竄入江境復形滋蔓將此由五百里諭令知之○子江南陣亡副將彭迎祥祭葬世職○庚寅以報解硝礦遲延直隸山東河南順天各督撫府尹下部議處○辛卯諭議政王軍機大臣等喬松年奏陳報西南兩路軍情並英翰一軍攻克金家寨及陳國瑞折回光州各摺片據稱賊竄過松子關後一股竄往豫境一股竄入皖境之金家寨地在六安霍邱之間喬松年以軍情緊急將英翰調回英翰隨與郭寶昌進兵攻克金家寨餘賊向南潰遁卽著飭令英翰等跟蹤躡勦務將此股敗匪盡數殲除毋令死灰復然又成滋蔓其英山一路之賊圍攻蔣凝學營壘經該道督軍苦戰擒斬甚多賊始解圍惟該處偏近羅田恐賊接踵而

來尚須後路接應蔣凝學兵力本單前經諭令會國藩撥營前往
英霍助勦見經該督調派劉連捷朱洪章兩軍來皖官文亦派譚
仁芳馳赴英霍兵力已厚著喬松年催令各軍迅速前來會同蔣
凝學等軍力遏兇鋒杜其竄擾張得勝見在六安與英翰蔣凝學
兩軍相爲掎角著飭令勤探兩路軍情何處緊要卽往何處協助
防守巢縣之兵如尚可撥援英山仍著曾國藩調派前往其竄入
豫境一股見已在商城羅山一帶游弋僧格林沁進擣羅山步隊
不敷分布著官文遵照前旨速派成大吉等出境追蹤並派撥步
軍繞前截擊張之萬亦當遵旨將見有步隊檄赴光羅歸僧格林
沁調遣前諭僧格林沁於陳國瑞到營後查看該員會否實有反
情妥籌辦理茲據喬松年奏稱陳國瑞本由光山赴該大臣軍營
見已折回光州不知會否謁見等語該總兵向來打仗勇敢曾著

功績本屬有用之才惟在駕馭得宜恩威並用此次該員叛狀既
未確有實據或尙可就我範圍惟因何折回光州會否到營謁見
著僧格林沁詳細具奏如果叛迹昭著自外生成自當聲罪致討
喬松年即可飭防軍杜其入皖若因迹在疑似之間操之過蹙激
成事端亦非朝廷保全功臣之道此事惟在僧格林沁辨別眞僞
斟酌機宜妥籌辦理正在寄諭聞據富明阿奏遵撥富陞馬隊赴
皖並詳陳江北情形一摺富陞所部馬隊一百二十餘名見經富
明阿飭令赴皖卽著迅催該副都統剋日起程前往壽州聽候喬
松年調遣惟據富明阿奏稱賊有秋涼東竄之語恐其繞越安慶
由巢舒各城直達和含則裏下河一帶亦不可不防如該逆覬覦
江北揚防處處喫重喬松年當仍飭令富陞管帶所部馬隊迅速
回揚不得稍分畛域曾國藩隨時偵探如果揚防有警亦當酌量

撥兵協助富明阿之軍先事豫防毋稍大意皖北見在兵力較厚
喬松年務將此起竄匪就地殲除並力扼要隘毋令賊匪東趨擾
及完善將此由六百里各諭令知之○諭楊岳斌沈葆楨奏籌防
東路情形一摺江省之賊自許灣敗潰後金谿南豐等城相繼克
復賊燄頓衰相率西遁楊岳斌督軍跟追並飭江忠朝等繞赴上
游截擊其浙省之賊自湖州克復後已棄廣德赴甯國分道狂竄
賊悍且多廣饒防兵單薄甚屬可虞是江省東路尤爲喫緊前因
左宗棠奏堵逆黃汝金等由績溪祁門等處分路上竄恐其假道
徽池以擾江西當經諭令左宗棠嚴飭提督高連陞等軍從徽嚴
一帶截擊李鴻章飛調得勝兵勇會同浙師出境追剿見在鮑超
擬由撫州至東鄉劉典已由甯都拔營前赴婺源卽著該提督等
各統所部星馳進擊力挫兇鋒左宗棠李鴻章恪遵前日諭旨督

飭派出各軍分路追擊與江省諸軍會合四路兜擒將湖州逸匪
盡數殲除母任逃竄侍濂等逆西竄何處必須極力跟追方免滋
蔓江忠朝王文瑞等業經繞赴上游席寶田韓進春既已拔營西
行自應探明賊蹤相機勦辦昨據會國藩奏楊岳斌赴任後江省
南北兩路令鮑超劉典分辨見在劉典已赴婺源其勢不能折而
西馳著沈葆楨責令席寶田韓進春等覘賊所向實力截擊如兵
力尙嫌單薄卽由沈葆楨酌量調派楊岳斌接奉前旨諒已部署
起程沈葆楨身任封圻責無旁貸著會同鮑超劉典等和衷商辦
迅圖歲事會國藩亦當妥籌兼顧以維大局正在寄諭閒揮世臨
奏黔匪大股復行勾結下竄侍濂等逆竄近贛郡各等語江西之
賊由甯都擾及雩都縣屬樂坳地方逼近贛郡揮世臨已派趙福
元馳抵太和劉德謙等添募一營同駐興甯周興隆募勇五百名

前赴鄆茶邊隘以便王永章唐應聘等移營出境卽著飭令趙福元等會同席寶田等軍兩路夾擊一面飭令王永章等移師出境覩賊所向橫出截勦以期聚殲劉德謙周興隆等募勇守邊自爲添助兵力起見惟新募之勇訓練需時各營勇丁裁撤回籍者甚多著憚世臨酌撥若干名交劉德謙等管帶嚴防要隘以資得力黔匪圖撲沅州經湖南官練擊敗後竄回貴州金家場張家寨迺匿玉屏縣苗匪下竄洞波汪家溪敗歸竹寨章寨一帶另股圖擾涼繖之賊雖未得逞而天柱股匪又分竄靖沅邊界縱橫紛竄肆出滋擾若不迅圖撲滅勢將處處燎原終成不了之局著勞崇光張亮基飭令派出防兵會合楚師聯絡聲勢認真兜勦以收夾擊之效楚境邊隘仍著憚世臨督飭周洪印等嚴密堵遏以保疆圉將此由六百里各諭令知之○予貴州陣亡副將胡均祿祭葬世

職○王辰諭議政王軍機大臣等左宗棠奏截勦竄賊大勝官逆
黃汶金等就戮一摺徐宗幹奏張運蘭到閩接任卽赴防所勦辦
並康熊飛克復新城情形林文察奏臺灣大局底定撤隊內渡各
摺片覽奏均悉堵逆黃汶金由廣德繞過甯國分竄昌化淳安等
處屢經官軍擊敗並殲斃黃汶金黃汶英等逆黨甚多勦辦甚嚴
得手惟洪幼逆及僞祐王李遠繼等尙在稽誅人數不下四五十萬
著左宗棠督飭諸軍盡力搜捕毋畱餘孽黃汶英旣與洪幅瑱同
逃洪幼逆必在淳安一路據獲賊供幼逆逃去時將頭髮髮鬚裝
扮洋人希圖混竄左宗棠已令諸軍物色著卽密飭購捕務在必
獲並傳諭各營將弁如獲得洪幼逆必仍破格重賞斷不可任令
免脫楊輔青已由湖州雜髮潛入上海著李鴻章派委妥員密速
擒獲黃汶金逆屍是否瘞於白牛橋側著於掘驗後由左宗棠隨

報附奏浙江餘逆恐何結前竄江西各逆聯爲一氣會國藩沈葆楨當遵照厯次諭旨飭諸軍截勦不可稍涉大意張運蘭葉經接印任事其所部勇丁已可行抵汀境著左宗棠徐宗幹卽催該臬司剋日出省前赴邵武防所迎提全隊擇要駐紮與康國器會商出關兜剿仍令查明建甯汀州各屬要隘及江西各路軍情多設偵探嚴密堵禦毋致稍有疏失會玉明林文察二員早已有旨令其內渡本日適據林文察奏到擬卽配船內渡仍著該督撫委員迎提如仍無內渡信息卽行從重參處新城之役前據江西奏到情形甚略亦未提及閩軍出力各情徐宗幹轉據康國器稟稱康熊飛率勇將黃沙渡等處賊壘十二處次第勦平賊退入城康熊惶失措越城由石溪頭向南豐大路而去其情形是否確實仍著

沈葆楨徐宗幹會同查明具奏並查明此股逆眾竄向何處責成各路防軍會合痛勦未可蹈勝不相讓敗不相救之習致滋蔓延陳啞狗弄一犯前據徐宗幹會元福奏報均稱於五月二十三日生擒正法本日林文察奏該逆受傷泗水逃遁該逆之族垓培大突等莊跟蹤圍捕於二十四日該莊頭等將陳逆獻出情形既有互異則下手出力卽迥不相同著左宗棠徐宗幹切實查明具奏俾將來列保各員不至有遺漏冒濫之弊臺郡大局已定彰屬餘匪林文察已交林文明分別搜捕該提督卽撤隊內渡商辦閩省邊防事宜毋再遲誤干咎臺灣餘匪著左宗棠徐宗幹責令會元福丁曰健寶力辦理洪檮一犯必須擒獲正法以淨根株毋任漏網將此由六百里諭知會國藩左宗棠李鴻章沈葆楨徐宗幹並傳諭林文察曾玉明會元福丁曰健知之○以林鴻年爲雲南巡

撫劉徽昭爲雲南布政使席寶田爲雲南按察使

由巡道遷東

○癸巳

諭內閣見在庫車等處逆回變亂業經飭調各城勁旅陸續進剿

大兵一到不難立就殲除因思國家撫育黎元漢回居民均係赤

子回疆自隸版圖百有餘年朝廷一視同仁從未嘗稍存歧視前

因內地漢回構釁屢經明降諭旨飭令各統兵大臣分別勦辦止

分良莠持平辦理並令刊刻謄黃剴切曉諭見在新疆各城回匪

紛紛釁亂自必係內地逃出奸民編造謠言肆行煽惑惟恐良回

不信故先布散全行誅滅回眾之語劫之入夥當其劫掠貲財則

奸回獨享其利及至官兵誅戮則良回共受其殃哀此愚民實堪

矜憫著新疆各路大臣仍遵疊次諭旨分別勦撫但將爲首滋事

回匪殲戮不可因回民中有恃強玩法之人卽將安分良回概行

株累其有被逼脅從者但能悔悟解散卽是安分良民一概免其

究治經此次訓諭之後須知朝廷撻伐從無將安分回民概行勦辦之理至新疆各部落回眾自入版圖以來百有餘年均皆安分更非內地附居之漢回可比縱有奸回肆行搖惑斷不可信仍當各保各境齊心禦侮同膺懋賞不可心生疑懼墮其奸計而害及身家是爲至要該各城大臣卽將此旨刊刻謄黃再行曉諭以示朝廷胞與爲懷之至意○諭議政王軍機大臣等官文奏斬羅賊匪踞險牽掣官軍驟難出境追擊並防北竄股匪回擾楚境一摺鄂省東竄賊匪屬聚斬羅交界之大小界嶺等處依山踞險抗拒官軍賊勢綿亘幾二百里雖經官軍分路環攻而賊情甚爲狡譎迄未大受懲創官文見飭成大吉等分由大小界嶺月山互爲援應進剿斬水之賊譚仁芳等分由鴨子坂駱駝坳一帶進剿周鳳山扼守團之賊李成謀馳赴麻城何處有賊卽由何處進剿周鳳山扼守團

彼何處緊急卽由何處援應布置尙爲周妥卽著官文嚴飭派出諸軍會同蔣凝學等由英山兜剿之軍實力進攻務將該逆就地殲除毋任蔓延爲患如逆黨被創奔突仍飭諸軍躡蹤追剿不准稍分畛域並著曾國藩飛飭赴援之劉連捷朱洪章及續派各軍分由宿松太湖及桐城潛山一帶進兵會合蔣凝學何紹彩等軍嚴遏英霍竄匪相機迎剿毋徒株守本境喬松年卽飭英翰郭寶昌等實力會剿迅殲醜類其由黃安北竄光山股匪經僧格林沁擊勦復竄羅山境內並撲孝感縣屬之三里城一帶見據官文探知該逆仍欲乘隙窺伺黃孝應德圍犯隨棗一帶如楚邊無懈可乘卽由信羅直犯南陽前因僧格林沁進剿羅山逆匪馬隊未能得力諭令官文迅飭成大吉李成謀等步軍出境夾擊見據官文奏稱斬羅賊勢尙張成大吉等軍見在分路剿辦一時未能出境

另派姜玉順蕭河清常興阿蘇倫保溫德勒克西馬步各軍由河
口鈔出賊前徑赴三里城德孝等處與豫軍會剿仍分撥隊伍馳
赴武勝關探明豫軍及僧格林沁之軍見紮何處卽由何處出境
夾擊卽著僧格林沁迅速催提赴光羅一帶協剿竄匪姜玉順等
馬步各隊共有若干名如步隊爲數尙多可資分撥卽由官文知
照僧格林沁抽調赴營以厚兵力其羅山信陽毗連南陽各要隘
著張之萬選派勁旅加意防維毋任匪蹤闖入並懔遵疊次諭旨
迅派得力步隊前赴僧格林沁軍營以資調遣僧格林沁張之萬
務當會飭諸軍與楚省所派姜玉順等軍盡力扼勦成大吉李成
謀步軍仍著官文隨時酌度軍情如蘄羅賊勢少衰可以抽調出
境卽遵前旨迅飭成大吉等繞出羅山之前與僧格林沁等軍前
截後追以收夾擊之效黃孝應德各路要口並著官文飭派出防

軍嚴密遏截毋稍疏懈將此由六百里各諭令知之○諭官文奏請將各省釐金畱作善後之費除直隸山東山西河南陝甘雲貴廣西買遷艱遠釐金不多無濟於事軍務告竣即可議撤外其餘若江皖蘇杭福建兩湖四川廣東等省釐金雖軍旅歲事止宜嚴禁重科萬不可驟議裁撤請緩至三五年後軍事大定再議裁除等語軍興以來舉辦釐金原因度支告匱不得已而借資民力以濟餉需乃行之未善墨吏奸胥任意侵漁藉端訛索以百姓之脂膏供奸徒之中飽病商病民於國課仍無裨益是以朝廷屢經降旨裁革茲覽該大臣所奏亦屬實在情形見在東南等省大局雖已桷定而百廢待舉需用浩繁於釐金一款本未能盡議裁撤昨據富明阿吳棠奏稱裁併各局卡共七十二處見存各處正局分局各軍尚未盡撤暫行酌畱等語朝廷已經明降諭旨俯如所請

總之釐金一項全在地方官實心經理果能弊絕風清未始非一時權宜之計所有兩湖釐金卽著官文擇其扼要處所抽收豐旺者酌畱照常抽收總期有裨國用無累商民方爲兩全之策如有不肖官吏蒙混侵蝕肆意婪索以致擾累民生並著官文隨時查察嚴行懲辦以杜弊端將此諭令知之○諭文祥奏哈密地方緊要乏員接署勢難赴任並郡王伯錫爾誠實可靠請明降諭旨曉諭回眾各指片據稱南路自文永一軍失利後吐魯番境內之匪聞風響應圍困城池兜鋒逼近北路木壘奇台一帶之匪聞烏魯木齊變亂後焚燒街市圍困古城幸連得勝仗舊城並未失陷見在自古城至巴里坤一帶道路稍通哈密爲新疆門戶見在南北兩路回氛肆擾哈城防務關繫緊要見既乏員接署文祥卽暫緩起程仍著將本城防守事宜妥爲布置勤加偵探如有賊蹤竄近

卽派兵迎頭截擊毋令闖入境內哈城回眾尤宜加意撫綏聯絡
防禦伯錫爾忠勤懋著前已加銜示獎茲復據文祥奏稱該郡王
已函札各城台吉伯克等竭力報效殺賊立功實屬深明大義著
文祥傳旨嘉獎卽商令派出回兵隨同官軍妥籌防勦以資得力
古城百姓旣甚出力連獲勝仗該匪退至南山吉布庫更格爾二
處紮營仍不時出沒焚燒村莊著保恆激勵兵民奮力堵勦堅守
城池以固東路之防庫車失守以後文永進勦失利亟應添兵繼
進見在文祥旣不能分身該處軍務不可無人督辦明緒人尙明
白前已由塔城帶兵馳回伊犁此時計已可到著常清商同將各
城防勦事宜布置就緒後明緒卽選帶得力之兵酌量南北兩路
緩急情形取道進勦所有旗緣各營官員兵丁均歸明緒調遣明
緒接奉此旨卽當迅速籌畫毋稍遷延常清統轄各城責無旁貸

見在南北軍情毫無頭緒該將軍務當懔遵屢次諭旨催提前調
喀爾喀等兵籌備口糧器械星速前進以利攻勦毋得一籌莫展
坐失事機至新疆各城之變皆由奸徒捏造謠言多方煽亂各城
大臣總當分別責成持平辦理豈可概將安分良回悉行殲戮據
文祥奏稱傳聞依奇哩將喀喇沙爾回民全行誅戮以致流言四
起相繼作亂是否實有其事著常清等查明具奏新疆自入版圖
以來各部落回民食毛踐土百有餘年率皆良善卽該處附居之
漢回亦皆安分居多何至毫無天良率行稱亂總由內地逃出漢
回乘機煽惑於中取利致令良回實受其害本日發去明發諭旨
一道著常清明緒文祥刊刻臘黃頒發各城徧行曉諭以安眾心
惟回部恐不甚通曉漢文可卽將頒去明發諭旨令伯錫爾譯出
回文派員前赴各城宣示回眾正在寄諭聞據常清奏庫爾喀喇

烏蘇回匪變亂焚燒軍臺殺傷兵民見派圖庫爾管帶兵丁遣勇二千二百名分起赴援並調土爾扈特蒙兵三千名協力進剿聲勢較壯著卽督飭圖庫爾等星速前進務將庫爾喀喇烏蘇賊匪趕緊撲滅節節東趨進援烏魯木齊以靖北路逆氛至南路各城待援甚急據奎棟奏庫車回匪擾及阿克蘇官兵在鹽山口一帶堵截馬步全被衝散道路阻滯奎棟已咨伊犁喀什噶爾催調兵丁應援卽著常清酌量情形派撥兵勇疏通道路前往接應奎棟亦卽添調就近各城兵丁馳往阿克蘇助剿迅殄逆氛常清奎棟仍一面將本日所發安撫良回諭旨譯出回文派令誠實回子分投剴切宣示開導以釋羣疑常清請將平瑞景廉奎棟嚴加議處並自請嚴議該將軍等均有地方之責辦理不善以致各城變亂厥咎甚重壹嚴議所能蔽辜著俟查明各城失事情形覆奏到日

再降諭旨所請調撥內地兵丁一節見在各路軍務漸次蕩平不
日當可騰出兵力出關助剿常清等亦當就見有兵力悉心籌畫
不可專待援兵致誤戎機嗣後非極緊要軍情不必擅發八百里
摺報以免駭人聽聞俄人兵隊見已撤退仍著常清隨時偵探防
範將此由六百里各諭令知之○甲午諭議政王軍機大臣等上
年疊諭賈洪詔進駐東昭相機籌辦乃賈洪詔受命一年有餘仍
未離川省一步不得不將其罷斥見在林鴻年已擢任封圻自應
由川起行前赴昭通一帶妥爲部署劉獄昭所部九營駱秉章卽
令帶往昭通隨同林鴻年前進其口糧等項卽由川省酌量籌畫
以資接濟昭通有楊盛宗署理鎮篆於雲南情形亦頗熟悉悉該撫
等卽可飭令妥籌辦理馬如龍三世忠貞深明大義岑毓英亦以
忠義自許如其善爲驅策未嘗不可爲先路之導前據勞崇光奏

馬如龍彈壓省垣籌濟糧餉軍火岑毓英帶兵出省數月之中克堅城十數處復據尚書趙光奏滇省見在情形並將該省紳耆士庶公啟呈覽內稱馬如龍岑毓英均屬勉圖上進不憚以回攻回爲回教所忌亟應優加獎敘會諭令勞崇光等先將攻克楚雄景東等府廳縣出力情形確切查奏候旨施恩著勞崇光等仍遵前旨趕緊查明據實保奏以示鼓勵惟須賞及有功不可稍有冒濫並著勞崇光林鴻年傅諭馬如龍岑毓英令其激勵兵勇妥速進剿刻日攻拔大理殄除杜汶秀以明心迹而膺懋賞朝廷大公之心初不以漢回稍存歧視馬如龍等進兵大理亦當令其切體此意分良莠不分漢回如有漢民從賊者概予誅鋤其有良回被脅或不肯甘心從賊者均當分別撫綏安插毋令玉石俱焚文武官弁亦須分別賢否兼收並用稍有偏私卽不能爲人所畏服林鴻

年劉繼昭不日卽抵昭通東川馬如龍等進剿之軍自不難聲勢聯絡席寶田久在行間所部素稱勁旅刻下江西軍務漸定俟該省無事即可令其帶兵赴滇所有應辦之事應籌之餉駱秉章勞崇光林鴻年均當悉心籌畫以期無負委任徐之銘葉經病故巡撫關防著林鴻年飭令岑毓英派員齎送行營以昭信守林鴻年劉繼昭均著隨時籌商相機妥辦毋庸來京請訓將此由六百里各諭令知之○諭昨因賈洪詔藉病規避降旨將其革職並簡授林鴻年等爲雲南巡撫藩臬本日另有寄諭駱秉章勞崇光林鴻年諭旨一道該督撫等不妨錄示馬如龍岑毓英等令其迅速進兵妥辦此時兵力餉力斷不能及迤西一路若馬如龍岑毓英果能奮勉出力將大理攻克杜汝秀擒斬其心迹不辨自明朝廷自當論功行賞曲示優容若徒有討賊之名並無尺寸之效則是藉

勦賊以自固仍不免暗中勾結聯爲一氣又豈能久假兵柄致有
太阿倒持之弊本年七月二十五日所諭甚明駱秉章等惟當遵
照前奉諭旨妥爲籌辦杜逆攻取建南之說是否確實駱秉章務
當密爲偵探豫籌防範徐之銘已死岑毓英曾否將巡撫關防齎
送到川著林鴻年專弁往取前因賈洪詔奏稱徐之銘徇私濫保
請將所保各員撤銷當經明降諭旨允准交賈洪詔於到滇後酌
量宣示嗣因滇省各案所保人員雖多冒濫亦未必無認眞出力
之人見當用人之際豈可令其寒心復疊次諭令賈洪詔妥爲收
存暫緩宣示著駱秉章林鴻年就近向賈洪詔索回此旨附報恭
繳無庸宣示如有應行查辦者俟將來滇南軍務大定再行酌辦
上年十二月二十四日及本年三月十八日四月十五日並歷次
所降諭旨均著駱秉章勞崇光鈔咨林鴻年閱看該撫見在何處

及如何籌辦之處並著趕緊具奏嗣後凡密諭事件該督撫等均不得假手於人致事機或有宣露懷之慎之將此由六百里各密諭知之○諭明誼奏請簡派立界大臣一摺前因明誼等奏請派各城大臣四員換約後各赴本境建立界牌經總理各國事務衙門開單呈覽當經派出廣鳳等三員以專責成茲據明誼奏俄使換約後立界時烏里雅蘇台亦須專有大臣建立界牌鄂博請於麟興車林敦多布二員內簡派一員等語所有烏里雅蘇台立界事宜卽著派麟興專司其事見在分界一事雖准照議單辦理惟換約後立界時仍須時防格外侵占麟興既經簡派責任綦重卽著會同車林敦多布將應立界牌鄂博處所豫爲妥商俟換約事竣俄使前來時卽由麟興按照議定界址與俄使建立界牌鄂博務須辦理周妥明誼等亦須咨照各城豫籌妥辦庶臨時較有把

握將此由五百里各諭令知之○丙申僧格林沁國瑞奏我軍於八月初三日與賊接仗後該逆潛伏未動初五日卽令署翼長成保總兵楊長春巴揚阿等管帶馬步各隊進紮莽張潘家店等處以遏賊匪西竄總兵陳國瑞管帶本隊千餘名到營亦令隨同成保等進剿其已故翼長舒通額馬隊並令護軍統領恆齡接統十三日探得該逆漸移羅陳店以東盤踞成保等軍卽進紮羅陳店臣僧格林沁於十四日帶領馬隊移紮光山之胡家園適臣國瑞亦由長嶺選帶病痊馬隊三百餘名到營十四日成保等探得該逆在柳林寨大山寨一帶虧聚我軍卽行出隊商令陳國瑞帶隊在前楊長春爲西路尹作賓爲東路宋慶居中巴揚阿爲後路策應成保督帶馬隊繼進天始向明我軍齊抵柳林寨北分路衝壓燒賊百餘名該逆復分路回拒我軍連攻數次斃賊數百名匪勢

不支紛紛敗退我軍勇氣百倍入山窮追數里直過柳林寨南該逆復糾山後伏賊將我軍截爲兩斷並踞住山口馬隊限於地勢不能衝突巴揚阿尹作賓等步隊亦爲賊牽掣不能與陳國瑞等軍會合致陳國瑞宋慶楊長春等軍全行被圍巴揚阿尹作賓更番進攻因山路狹窄不能合攻該逆死拒不退我軍內外交攻兩晝夜乾糧已盡仍復忍飢鏖戰於十六日黎明始將賊匪擊退陸續救出陳國瑞等軍總兵巴揚阿力竭陣亡參將尹作賓尚無下落容俟查明再行辦理臣等於十六日督帶馬步各隊進紮柳林寨以西王家灣十七日探得該逆又穿山向東南一路奔竄頭股已過光山屬之新店後股竄至潑陂河臣等遂督隊緊躡追至潑陂河營營一面扼防北路一面撥馬隊跟勦五十餘里至新店地方該逆即入楚境向南奔竄馬隊難以窮追見在該逆既向南狂

奔意在竄入山險避我馬隊而楚地山嶺分歧東竄則麻城南竄
則黃安西竄則應山處處宜防非厚集步隊不能制賊死命遂咨
會督臣官文催提督姜玉順蕭河清等各率所部迎頭截擊偏令
該逆出山俾馬隊得以鈔擊臣等暫紮潑陂河覘賊所向進剿再
據總兵張曜臬司英翰等先後報稱東竄髮捻股匪已至商城東
南流波確地方復由麻埠東竄六安壽山一帶見在英翰郭寶昌
各帶所部已由胡家店繞赴六安攔剿該逆知六安有備見又折
踞漫水河一帶游弋其另股先竄蘄水之馬融和等刻已至英山
地方臣等飛飭張曜英翰等無分畛域迅將此股賊匪竭力進剿
勿令蔓延陣亡之總兵信陽協副將巴揚阿相應請旨交部從優
議卹以慰忠魂其餘陣亡官兵勇容俟查明再行具奏 上諭
議政王軍機大臣等逆匪竊山向新店一路奔竄後股已至潑陂

河僧格林沁緊躡其後該逆竄入楚境大山向南奔竄馬隊不能
窮追著官文飛飭姜玉順蕭河清等各率步隊迎頭截擊務須將
山內賊匪就地殄除勿再任其紛竄如該逆被逼出山馬隊可以
施展卽著僧格林沁督飭諸軍乘隙兜剿儻不得地勢仍當令陳
國瑞等步隊向前毋庸令馬隊跋涉山險田埂致令再有疏失成
保帶隊如不得力卽行揀員更換東竄之賊由麻埠竄六安青山
一帶英翰郭寶昌各率所部由胡家店繞赴六安攔截逆知六安
有備折踞漫水河一帶游弋其另股馬融和等已竄至英山地方
該親王已飛飭張曜等迅殄此股惟該逆既分竄六安英山等處
地勢寬廣張曜英翰郭寶昌等兵力尙恐不敷分勦著曾國藩喬
松年督飭蔣凝學等軍認真迎剿劉連捷朱洪章之軍當已陸續
到英霍一路會國藩等催令速進與蔣凝學何紹彩等會合夾擊

一面仍將續派各軍迅催入皖視何路兵單卽飭赴何路助剿官文前派譚仁芳馳赴英霍此軍已否入皖並著催令速進以厚兵力其黃安等處要隘仍著官文妥籌兼顧毋令回竄僧格林沁另招奏陳國瑞到營後伏怨戴罪勦賊並身臨前敵困苦備嘗未嘗不自知愧悔當此用人之際自應善爲駕馭以供驅策僧格林沁所奏操縱深合機宜該員見已降三級調用仍畱軍營效力如能立功自贖將來仍由該親王奏乞恩施惟在該親王隨時妥爲調遣以成其材將此由六百里各諭令知之○諭德興阿奏就撫陝回宜防詐僞毋令仍歸原籍擬飭曹克忠暫禁鳳寶請畱金順馬隊並自請獨當一面各招片據稱鹽固回逆就撫該匪詭詐狡猾乞撫緩兵乃其故技若令仍歸原籍與漢民雜處勢難相安且西同兩屬多成荒土任令自爲棚巢必致紛爭啟釁不若俟其真正

窮蹙乞降再爲分別安插等語回匪意存反側屢降屢叛朝廷久經洞燭其奸本未嘗一意主撫前據都興阿奏鹽固回逆就撫節據臬司楊柄鋗等稟訴陝回流離困苦情形必須遣回陝省本籍復業因人數過多請派大員赴甘查辦當經諭令張集馨以此項回眾其兇頑渠魁原應實力殄除至脅從老弱若必悉數誅夷殊非國家好生之意將來甘肅回眾不能不就本境安插如就撫陝回亦令棲身甘省流寓異鄉勢難經久似不若各歸本籍尙可復謀生業張集馨明白曉事是以令其前往妥爲籌辦此事仍著張集馨於抵甘後酌量情形與都興阿雷正綰籌商安置之法仍當分別良莠悉心籌畫如實係安分良回自不能不爲之代謀生計固不可令莠回於回籍後滋生事端尤不可令安分被脅良回流離失所總在該臬司辦理得宜仍不准回護前說膠執已見並著

張集馨剋期趕緊起程一面自行具奏不准託故耽延前諭曹克忠統帶所部原營速赴河州鎮本任見據德興阿奏稱恐賊匪回竄終南請飭曹克忠所部七營暫紮鳳寶以資防禦並願雷正綰陶茂林後路等語該總兵可否暫緩赴任並陝省是否必須曹克忠一軍方敷分布著都興阿雷正綰劉蓉妥商辦理如曹克忠駐鳳寶一帶與雷正綰等軍聲勢尙難聯絡卽著雷正綰催調曹克忠前進其鳳寶一帶卽著劉蓉妥籌兼顧穆圖善尙未起程卽著迅帶所部前往甘省會同都興阿雷正綰妥籌勦辦毋再遷延金順馬隊著照德興阿所請暫畱陝西俟該省軍務稍鬆仍著調赴甘省以厚兵力陝南近日軍情若何著劉蓉檄飭各軍節節進剿以期廓清疆宇德興阿呈遞履歷自請獨當一面朝廷簡派統帥自有權衡豈容自行瀆請至德興阿從前辦理軍務朝廷知之甚

諱乃率行呈遞履歷鋪敘戰功尤屬冒昧德興阿見署西安將軍印務操練旗營辦理防守責任甚重卽著慎固城防實心辦理毋得稍涉疏懈如賊蹤距省較近該署將軍原應將城守布置妥協帶兵出剿本無待臨時奏請致誤事機將此由六百里諭知都興阿雷正綰穆圖善德興阿劉蓉並傳諭張集馨知之○廣福建上杭縣學額三名○予河南陣亡總兵官巴揚阿祭葬世職○丁酉諭議政王軍機大臣等雷正綰奏攻拔龍山鎮逆巢進攻蓮花城情形並回原復爲回陷各摺片雷正綰一軍攻克張家川後乘勝進拔龍山鎮逆巢並將邵家店馬家堡各小巢平毀因聞固原回逆復變該署提督督隊力攻蓮花城急圖克拔以便移師隆靜詎銳師乘勝深入山險人馬礙難旋布雷正綰猝被矛傷領下弁勇陣亡者千餘名拔覽之餘曷勝屢繫著雷正綰趕緊調治一俟傷

口平復卽行整飭隊伍與陶茂林會督諸軍迅拔蓮花城老巢移軍隆靜規復固原疏通蘭州驛路兼顧省防雷正綰所部各營因疊次傷亡及裁汰老弱外見在賊蹤蔓延已屬不敷勦辦而固原州城復於八月初四日被陝回孫義保潛帶賊眾四千餘人勾合城中回逆赫明堂等乘夜襲陷固原鹽茶回眾前經甘詞乞撫此次陝回卽勾結內應撲陷固原可見若輩狼子野心萬難寬宥亟應大加懲創俾其震懾軍威始能徐議招撫著穆圖善懷遵疊次諭旨迅卽統帶所部赴甘會同都興阿雷正綰妥爲籌商應由西路進兵助勦均著相機辦理都興阿一軍已抵靈州花馬池能否與雷正綰聲息相通並著酌度機宜先與雷正綰等軍聲勢聯絡再行節節進兵毋稍大意雷正綰見經派員分赴楚豫各路招募勇丁剋期赴營著劉蓉於所募新勇經過陝境時將沿途所需經費

斤飭屬寬爲籌備供支毋令缺乏以利遄行並著催令曹克忠一
軍迅速入甘與雷正綰等軍聯絡進攻迅殲醜類其鳳寶一帶卽
著劉蓉妥籌兼顧江西軍務漸次肅清楊岳斌卽遵前旨將應辦
各事宜移交鮑超劉典與沈葆楨會籌辦理迅將酌帶所部剋期
赴甘何日起程並著先行馳奏所有雷正綰見在進兵攻取各要
隘著繪圖貼說呈覽將此由六百里各諭令知之○戊戌諭議政
王軍機大臣等恩麟奏河州被圍已久請飭曹克忠帶兵赴任並
河狄回匪分撲皋金地方兵勇擊勦失利及南路軍餉請旨酌定
供支省分並請飭催甘省及新疆餉銀各摺河州鎮城被圍日久
道員趙必達帶兵援救遷延不進畏葸無能實堪痛恨著革去三
品銜仍革職畱營以觀後效並著恩麟飭令該員會同參將胡飛
鵬迅速前進立解城圍儻再不知愧奮卽行從嚴參辦河狄回匪

分股竄撲皋蘭金縣地方遊擊鄒占先以二千餘名之勇禦二千
著拔去花翎摘去頂戴以爲玩誤軍情者戒至皋蘭被擾係本年
四月閒事何以遲至八月始行出奏可見恩麟平日全以消弭粉
飾爲事如此行爲豈能表率屬員力圖整飭無怪趙必達鄒占先
等之覆轍相尋也見在固原復爲賊陷而河狄等處一片賊氛省
垣爲根本重地恩麟務當激發天良督率員弁兵勇力籌防勦毋
稍疏虞經屢次訓飭之後儻再不知振作仍復泄沓因循貽誤大
局必將該護督從重治罪決不寬貸曹克忠一軍著劉蓉恪遵前
旨飭令該總兵統帶原部七營剋日起程赴甘毋稍稽延曹克忠
入甘後應由河路進兵著邵興阿雷正綰等妥籌調派務令東西
兩路各有勁兵聯絡一氣以勇齊進庶可痛埽狂氛陶茂林一

到甘後鑿克城隘所向有功其軍火糧餉曾經諭令陝省供支茲據恩麟奏接據陶茂林咨稱陝省以勦辦髮逆自顧不暇所需軍火餉項應仍由甘省支領等語甘省餉需久絀羅掘已空慶陽糧臺專顧都興阿軍餉勢已不及萬難兼顧他營而陶茂林所部士卒單寒帳房不蔽風雨一切軍械又不應手若餉需稍有不繼譁責堪虞著劉蓉凜遵前旨仍將陶茂林各營餉項軍火源源解毋得稍分畛域恩麟所請或由別省供支之處著戶部覈議速奏將此由六百里諭知都興阿雷正綰劉蓉並傳諭恩麟知之○責瑣解任查辦命於結案後來京以丁寶楨爲山東布政使恩錫爲山東按察使由鹽運使遷○于甘肅陣亡遊擊汪永楨祭葬世職○是月蠲緩江西蓮花等十九廳縣廣西永安等三十四州縣暨歸德等五土州新舊額賦雜課